

EPOKA

ERE

E përditshme e pavarur
Viti XXIII, nr. 7010
E hënë, 2 tetor 2023
Çmimi 0.50

Mirëpritet propozimi
i presidentes që për
Asociacionin të diskutohet
me ShBA-në | FAQE 3



Na ndiqni edhe në:

www.epokaere.com

facebook.com
Gazeta "Epoka e re"

AWR ABBRUCH GMBH
www.awr-abbruch.de

26 VJET NGA PROTESTA E LËVIZJES STUDENTORE E VITIT 1997 | FAQE 4

PROTESTA E LËVIZJES STUDENTORE E '97-s I DHA SHPIRT PLATFORMËS PËR ÇLIRIM DHE SHTET TË PAVARUR



26-vjetorin e protestës studentore të 1 tetorit të vitit 1997 e kanë kujtuar liderët e Lëvizjes Studentore dhe profesorë universitarë që ishin pjesë e asaj proteste. Në këtë

përvjetor u theksua se kjo lëvizje u bë simbol i rezistencës së rinisë dhe qytetarëve të Kosovës ndaj regjimit serb dhe u shndërrua në promotore të luftës për liri dhe pavarësi. Kjo ngjarje, thuhet nga

profesorët universitarë, duhet të shënohet në tekste shkollorë dhe të kujtohet nga gjeneratat e reja si akt sublim i fillimit të procesit të lirisë dhe pavarësisë së Kosovës

HOXHAJ: SUKSESI I POLICISË TË PËRKTHEHET NË FITORE DIPLOMATIKE, TË SANKSIONOHET SERBIA



MICHAELIS: GJERMANIA DHE SHBA-ja JANË NË KOORDINIM TË NGUSHTË PËR SITUATËN NË VERI TË KOSOVËS



OPINION

SKENARI I PËRFITIMIT TË ALBIN KURTIT MBI GJAKUN DHE FATKEQËSITË E TË TJERËVE F.7

Shkruan:
Prof. dr. Kudusi
LAMA, gjeneral në
pension



AKTUALE



OSMANI: SERBIA DUHET TA DIJË SE DO TË PËRBALLET ME NJË POPULL TË GATSHËM PËR TA MBROJTUR LIRINË ME ÇDO KUSHT F.7

SVEÇLA DHE HOXHA: AUTORËT E SULMIT TË 24 SHTATORIT NË VERI U PËRGATITËN NË PRONËN E RADOIÇIQIT F.7

MBYLLJA E QEVERISË AMERIKANE SHMANGET NË ÇASTIN E FUNDIT F.2

EKONOMI



PKD-ja NUK PAJTOHET ME PUSHTETIN PËR NUMRIN E TË PUNËSUARAVE NË KOSOVË F.8

ASK-ja: MË SHUMË TË PUNËSUAR ME PAGË PRIMARE DHE SEKONDARE NË GUSHT TË 2023-S SESA NJË VIT MË PARË F.8

RENOVA
PUTZ
Macedoni
Xhepçisht - Tetovë
Gurëz-Ferizaj
Tel: +389 44 487 300; +389 44 487 009
+389 44 487 755
+389 44 487 200
+389 44 501 289
E-mail: renova@mt.net.mk

PRINCESHA
GROUP SH.P.K.
NDËRTIM
PROJEKTIM
SHITJE
INFO: 049-111-101,
044-511-177
www.princesha-ks.com

Bunjamini
FABRIKA E LLAQEVE
MITROVICË
044/256-051
044/367-061
028/532-617
STYROKOL · BUNJAKOL · EUROFASADË

Kolegji BIZNESI
www.kolegji.biznesi.com
info@kolegji.biznesi.com
030 500 878 | 045 500 878
044 500 878 | 049 500 878

SIGMA
VIENNA INSURANCE GROUP
SIGMA INTERALBANIAN VIENNA INSURANCE GROUP SH.A
DEGA KOSOVË
Rruga "Pashko Vasa", p.n Prishtinë, Kosovë,
Tel: +381 (0)38 246 301 Fax: +381 (0)38 246 302,
E-mail: info@sigma-ks.net | www.sigma-ks.net

INFINITY
Digital Agency
Endrit Shaqiri
+38344685122
Internet Website,
Marketing...

Michaelis: Gjermania dhe ShBA-ja janë në koordinim të ngushtë për situatën në veri të Kosovës

WASHINGTON, 1 TETOR - Gjermania dhe Shtetet e Bashkuara të Amerikës (ShBA) janë duke u koordinuar ngushtë pas zhvillimeve të fundit në Kosovë ka thënë

ambasadori gjerman në ShBA, Andreas Michaelis. Michaelis ka shkruar në "X" se Kosova dhe Serbia janë fuçi baruti në Evropë dhe se duhet të merret

seriozisht rreziku. "Kosova/Serbia është një tjetër fuçi baruti në Evropë. Duhet të merret seriozisht rreziku. Koordinim shumë i ngushtë mes Gjermanisë

dhe ShBA-së në ditët dhe orët e fundit. Absolutisht çelësi për ta shmangur përshkallëzimin e mëtejshëm. Serbia duhet të veprojë tani", ka shkruar Michaelis.



Mbyllja e qeverisë amerikane shmanget në çastin e fundit

WASHINGTON, 1 TETOR - Qeveria e Shteteve të Bashkuara të Amerikës (ShBA) ka shmangur mbylljen federale, pasi Dhoma e Përfaqësuesve dhe Senati janë pajtuar për një marrëveshje financimi afatshkurtër të shtunën.

Një projektligj i cili e mban të financuar qeverinë deri më 17 nëntor, por në të cilin nuk përfshihet mbështetja e re për Ukrainën, është miratuar në Senat me 88 vota për dhe nëntë kundër.

Presidenti Joe Biden e ka nënshkruar atë në ligj pak para se të skadonte afati në mesnatë. "Ky është lajm i mirë për popullin amerikan", ka thënë Bideni në një komunikatë për medie.

Ky propozim është bërë nga kryetari i Dhomës së Përfaqësuesve, Kevin McCarthy, i cili është përballur me kundërshtime të mëdha nga ligjvënësit e ekstremit të djathtë nga partia e tij. Mbyllja e qeverisë, e cila do t'i çonte dhjetëra mijëra punonjës federalë në pushim pa pagesë dhe do t'i pezullonte shërbimet e ndryshme qeveritare, pritej të ndodhte më 1 tetor.

Por, kthesa dramatike ka ndodhur të shtunën mbrëma, pasi republikanët e Dhomës së Përfaqësuesve ia kanë dalë ta miratojnë masën e financimit të përkohshëm, i cili do ta mbajë qeverinë të hapur deri kah mesi i nëntorit dhe nuk do të bëjë më



koncesione të mëdha për nivelet e shpenzimeve.

Kjo masë ka marrë mbështetje më të madhe nga demokratët se nga republikanët, sepse hiç më pak se 90 republikanë votuan

kundër saj.

Për një grup të vogël të republikanëve të ekstremit të djathtë kjo ishte një goditje e rëndë, të cilët kishin mbajtur bisedime në Dhomën e

Përfaqësuesve me kërkesa këmbëngulëse për uljen e shpenzimeve.

Megjithatë, duke qenë se shumica e ligjvënësve ishin të vendosur për ta shmangur mbylljen, njëra nga kërkesat kryesore e këtij grup – ndalja e financimit të luftës së Ukrainës kundër pushtuesit rus – reflektohet në këtë projektligj.

Bideni ka theksuar se Shtetet e Bashkuara "nuk mund të lejojnë, në asnjë rrethanë, që përkrahja amerikane për Ukrainën të ndërpritet", duke shtuar se pret nga McCarthy "të vazhdojë të jetë i përkushtuar ndaj popullit ukrainas dhe ta sigurojë miratimin e mbështetjes së nevojshme për ta ndihmuar Ukrainën në këtë çast kritik".

Sulm me bombë pranë ndërtesave ministrore në Ankara

ANKARA, 1 TETOR - Ministria e Brendshme e Turqisë (MBT) ka njoftuar të dielën se dy "terroristë" e kanë kryer një sulm me bombë para ndërtesave ministrore në Ankara, duke shtuar se një prej tyre është vranë nga shpërthimi, ndërsa tjetri është "neutralizuar" nga forcat turke. Mediet turke kanë raportuar më herët se një shpërthim u dëgjua



afër Parlamentit dhe ndërtesave ministrore.

Ministri i Brendshëm i Turqisë, Ali Yerlikaya, ka bërë me dije se

dy oficerë të policisë turke janë plagosur lehtë gjatë incidentit që ka ndodhur në orën 9:30 të dielën.

Nuk dihet deri tani se kush mund të jenë sulmuesit. Grupet militante kurde dhe të ekstremit të majtë si dhe Shteti Islamik kanë kryer sulme vdekjeprurëse nëpër Turqi në të kaluarën.

Yerlikaya ka thënë se sulmuesit mbërritën në kompleksin

ministror me një veturë të vogël komerciale. Në pamjet e publikuara nga vendi i ngjarjes shihen ekipet e shpëtimit duke punuar pranë një veture të parkuar në zonën pranë Parlamentit të Turqisë dhe ndërtesave ministrore. Policia e ka mbyllur qasjen në qendër të qytetit.

Dy oficerët e plagosur po trajtohen në spital dhe gjendja e

tyre nuk është e rëndë, sipas medieve lokale.

Ndërsa presidenti turk, Rexhep Taip Erdogan, ka thënë se "terroristët" nuk do t'i arrijnë kurrë qëllimet e tyre në Turqi. Ky sulm është dënues nga shumë shtete, duke përfshirë Kosovën dhe Shqipërinë. Po ashtu, sulmin në Ankara e ka dënues edhe Bashkimi Evropian (BE).

Partia majtiste e ish-kryeministrit pro-rus i fiton zgjedhjet në Sllovaki

BRATISLAVË, 1 TETOR - Partia majtiste e ish-kryeministrit Roberto Fico i ka fituar zgjedhjet parlamentare të së shtunës në Sllovaki, pas një fushate pro-ruse dhe mesazheve anti-amerikane, kur janë numëruar pothuajse të gjitha votat. Partia e Ficos, Drejtimi Social Demokrat, SMER-SSD, ka dalë e para me 22.9 për qind, ka bërë me dije të dielën Zyra e Statistikave të Sllovakisë, pasi janë numëruar 99.98 për qind të votave nga 6000 vendvotime. Zgjedhjet e së shtunës ishin një test për vendin e vogël të Evropës lindore në lidhje me mbështetjen e fqinjës të saj, Ukrainës, në luftën kundër Ruisë, prandaj fitorja e Ficos mund ta dëmtojë edhe më shumë unitetin e brishtë në

Bashkimin Evropian dhe NATO. Fico është zotuar se do ta ndalë mbështetjen ushtarake të Sllovakisë për Ukrainën në luftën e saj kundër pushtuesit, Ruisë, nëse ia del të kthehet në pushtet. Sllovakia ka qenë përkrahëse e madhe e Ukrainës qëkur Rusia e ka nisur pushtimin e saj në shkurt 2022, duke i dhuruar armatim dhe duke i hapur kufijtë për refugjatët e ikur nga lufta. Meqë asnjë parti nuk e ka fituar shumicën parlamentare, atëherë nevojitet koalicion për formimin e qeverisë së re. Presidenti tradicionalisht i kërkon fituesit të zgjedhjeve të përpiqet ta formojë qeverinë e re, prandaj gjasat janë shumë të mëdha që Fico të bëhet përsëri kryeministër. Ai ka shërbyer kryeministër nga

viti 2006 deri në vitin 2010 dhe përsëri nga viti 2012 deri më 2018. Partia liberale pro-perëndimore, Partia Sllovakia Progresive (PS), ka dalë e dyta me 18 për qind të votave të fituara. Lideri i saj Michal Simecka, i cili është nënkryetar i Parlamentit Evropian, ka thënë se partia e tij e pranon rezultatin e zgjedhjeve. "Por, ky është lajm i keq për Sllovakinë. Do të jetë edhe më keq nëse Roberto Fico ia del ta formojë qeverinë", ka thënë Simecka.

Partia tjetër majtiste, Zëri, e udhëhequr nga ish-zëvendësi i Ficos, Peter Pellegrini, ka dalë e treta me 14.7 për qind të votave. Pellegrini e ka uruar Ficon për fitoren, por ka thënë se dy ish-kryeministër në një qeveri mund



të mos shkojë mirë. "Nuk do të ishte ideal, por kjo nuk nënkupton se një koalicion i tillë nuk mund të krijohet", ka thënë Pellegrini.

Një partner tjetër i mundshëm për koalicion për Ficon, Partia ultranacionale e Sllovakisë, e cila është haptazi pro-ruse, ka fituar 5.6 për qind të votave. Këto tri parti mund ta formojnë një shumicë parlamentare nëse i bashkojnë forcat në një koalicion qeveritar. Fico i kundërshton

sanksionet e Bashkimit Evropian ndaj Ruisë. Ka dyshime nëse Ukraina mund vërtet ta mposhtë pushtimin rus dhe dëshiron ta parandalojë futjen e Ukrainës në NATO. Ai dëshiron që, në vend se t'i dërgohen armë Kievit, BE-ja dhe Shtetet e Bashkuara duhet ta përdorin ndikimin e tyre për ta detyruar Ruisë dhe Ukrainën të bëjnë marrëveshje kompromisi për paqe.

Fico i ka përsëritur pretendimet e pabaza të presidentit të Ruisë, Vladimir Putin, se Qeveria e Ukrainës e udhëhequr nga shtet nazist nga i cili duhet të mbrohen rusët etnikë në lindje të vendit. Presidenti i Ukrainës, Volodymyr Zelensky, është hebre dhe ka humbur të afërm të vet në holokaust.

Mirëpritet propozimi i presidentes që për Asociacionin të diskutohet me ShBA-në

PRISHTINË, 1 TETOR - Propozimi i presidentes Vjosa Osmani, që draft-statuti i Asociacionit të Komunave me Shumicë Serbe në Kosovë të përgatitet bashkë me ShBA-në, është mirëpritur nga njohësit e procesit të dialogut Kosovë - Serbi. Sipas tyre, me amerikanët duhet të vendoset që Asociacioni mos të ketë kompetenca ekzekutive që e paralizojnë funksionimin e Kosovës. Ata kanë thënë se pavarësisht prej zhvillimeve të fundit dhe sulmit terrorist në veri, dialogu nuk ka alternativë.

Megjithatë, në partinë në pushtet, Lëvizjen Vetëvendosje, mbesin të vendosur se kushtëzimi për Asociacionin në kuadër të marrëveshjes së Brukselit dhe të Ohrit nuk do të zbatohet.

Profesori universitar Arben Fetoshi ka thënë për "Kosovapress" se kryeministri Albin Kurti duhet të ketë komunikim intensiv me përfaqësuesit e lartë të ShBA-së për Asociacionin, mbi bazën edhe të deklaratave të tyre se i njëjti s'do të jetë një nivel tjetër i pushtetit në Kosovë.

"Ajo çka na duhet tani është një

komunikim intensiv i kryeministrit Kurti me aleatët, me zotëri Escobarin në radhë, të parë për t'i siguruar garancitë që Asociacioni të mos jetë mekanizëm që e paralizojnë funksionimin e Kosovës. Ju e dini se kemi marrë vazhdimisht garanci nga ana ShBA-ja që Asociacioni të mos ketë kompetenca ekzekutive dhe Asociacioni s'do të jetë nivel tjetër i pushtetit në Republikën e Kosovës dhe mbi këtë bazë qeveria jonë duhet të lëvizë në drejtim të draftimit të statutit të Asociacionit në përputhje me vizionin e prezantuar nga kryeministri në mënyrë që pastaj presioni të zhvendoset mbi Vuçiqin", ka thënë ai.

Konstruktivitet në këtë temë pret edhe analisti politik Artan Muhaxhiri, i cili ka thënë se Kosova duhet ta ofrojë pozicionin e saj në raport me atë si e sheh Asociacionin brenda kornizës kushtetuese dhe ligjore të Kosovës. "Në momentin që pala kosovare do të dëshmohej si bashkëpunuese edhe këto presione do të largohen. Gjithsesi nuk duhet të harrohet në asnjë



moment që Asociacioni është pjesë esenciale e marrëveshjes finale. Pa garantimin e situatës së pakicës serbe në Kosovë, pas arritjes së marrëveshjes finale, pas një lloj njohje të shtetit të Kosovës nga ana e Serbisë, nuk mund të ketë asnjë mendim ose ide për përfundim të suksesshëm të dialogut", ka thënë Muhaxhiri. Pavarësisht prej deklaratës së presidentes Osmani për

Asociacionin, deputetja e mazhorancës, Fitore Pacolli, ka thënë se ekzekutivi duhet të jetë i kujdesshëm në raport me Asociacionin, pasi qëllimi i Serbisë është ta kushtëzojë për Asociacionin dhe mos t'i zbatojë pikat e tjera të marrëveshjes së Brukselit dhe të Ohrit. "Tani kemi kushtëzimin nga Serbia e cila thotë Asociacioni fillimisht tani dhe për të tjerat shohim. Ne si qytetarë të

Kosovës, si deputetë, si politikanë kemi mjaft mësim nga e kaluara dhe e dimë se çfarëdo hapa që marrin përfaqësuesit e Serbisë nuk mund të jenë hapa të drejtë dhe mund ta shohin situatën njëanshëm. Qëllimi i tyre është ta shtyjnë Asociacionin hapat e tjerë të marrëveshjes të mos realizohen kurrë", ka thënë Pacolli.

Pas sulmit terrorist në Banjskë të Zveçanit, presidentja Vjosa Osmani ka thënë se zgjidhja për Asociacionin është që Kosova të ulet me ShBA-në dhe ta përgatisë draft-statutin për Asociacionin e Komunave me Shumicë Serbe, brenda kornizës ligjore dhe kushtetuese të Kosovës.

Më 24 shtator një grup i armatosur rëndë terrorist ka sulmuar Policinë e Kosovës në Banjskë të Zveçanit, ku mbeti i vrarë rreshteri policor Afrim Bunjaku. Asociacioni ishte pika ndarëse mes Kosovës dhe Serbisë edhe në takimin e nivelit të lartë të dialogut më 14 shtator në Bruksel, ku kryeministri Albin Kurti akuzoi Vuçiqin se po kushtëzon Asociacionin me zbatimin e marrëveshjes së Brukselit dhe të Ohrit.

Hoxhaj: Suksesi i policisë të përkthehet në fitore diplomatike, të sanksionohet Serbia

PRISHTINË, 1 TETOR - Nënkrjetari i Kuvendit të Kosovës, Enver Hoxhaj, ka dënuar ashpër sulmin terrorist të 24 shtatorit në Banjskë të Zveçanit, ku ka mbetur i vrarë rreshteri Afrim Bunjaku dhe janë plagosur dy policë të tjerë.

Ai ka thënë se është momenti i fundit që bashkësia ndërkombëtare ta sanksionojë Serbinë, derisa nga Qeveria e Kosovës ka kërkuar që suksesin e policisë ta përkthejë në fitore politike e diplomatike. "Së pari, mendoj që Serbia e ka marrë përgjigjen e plotë duke demonstruar nga ana e Republikës së Kosovës që kushdo që bënë përpjekje ta sulmojë sovranitetin dhe integritetin territorial do të pësojë sikur që e ka pësuar ai grup terrorist, të cilët bënë një akt të agresionit mbi Republikën e Kosovës. Së dyti, mendoj që akti si i tillë padyshim që ka lidhje me politikën serbe, me shtetin serb, me vetë Aleksandër Vuçiqin, me që Aleksandër Vuçiqi para se të bëhet politikan ka qenë paramilitar dhe krejt çka e njeh ai në karrierën e tij të hershme është pikërisht organizimi paraushtarak, paramilitar sikurse ishte kjo bandë kriminale që sulmoi veriun e Kosovës dhe ne mendojmë që duhet të kemi një hetim ndërkombëtar mbi këtë çështje të pavarur dhe i takon Bashkimit Evropian si ndërmjetësues që pikërisht ta shtyjë çështjen e një hetimi ndërkombëtar me që nuk mund të jeni në tavolinë të negociimit për normalizim të raportit dhe në të njëjtën kohë të sulmoni një shtet sovran dhe të

pavarur... natyrisht që Serbia duhet të sanksionohet dhe është koha e fundit kur Serbia duhet të sanksionohet", ka thënë Hoxhaj për "KP".

Më tuje, nënkryetari i Kuvendit të Kosovës ka përmendur një mori argumentesh që e bëjnë Serbinë përgjegjëse për sulmin terrorist të së dielës së shkuar. "Padyshim se ajo çfarë ka ndodhur në veri të dielën ka qenë një sulm dhe akt agresioni i planifikuar, me agjendë të qartë politike, njerëz të cilët kanë qenë të trajnuar, armatim i cili është siguruar nga shteti serb dhe koha e prodhimit të këtij armatimi tregon që shteti serb është mbrapa dhe në Serbi nuk mund të blesh një pistoletë, revole në treg të zi, lëre më armatim për një këmbësori të rëndë me uniforma. Por, përtej sasisë së armatimit, kohës së prodhimit, unë mendoj që vëmendja në Kosovë duhet të jetë rreth agjendës së tyre politike, platformës, qëllimit të tyre politik dhe ajo se çfarë ka ndodhur të dielën nuk është asgjë tjetër veçse e ngjashme me një përpjekje për ta aneksuar këtë pjesë të territorit të Kosovës. Në pikëpamjen time është e ngjashme me aneksimin e Krimesë nga ana e Rusisë, është e ngjashme me penetrimin e forcave paraushtarake, paramilitare, bandave kriminale në Donbas, është e ngjashme me mënyrën sesi ka filluar lufta në Kroaci dhe se si ka qenë agjenda e politikës serbe për ta kontrolluar territorin e Kroacisë, është e ngjashme me atë se çfarë ka ndodhur në Bosnjë. Partnerët tanë



ndërkombëtarë duhet ta shohin aktin e agresionit të së dielës si një pikë kthese në raportet Kosovë - Serbi dhe në politikën rajonale", ka thënë Hoxhaj, duke shtuar se është e rëndësishme që të hetohet në tërësi rasti dhe Kosova të ripozicionohet.

Sulmi terrorist, kërcënimet e vazhdueshme të Serbisë dhe ambicijet e saj serbomëdha, Hoxhaj ka thënë se dëshmojnë se Kosova nuk guxon të kthehet në tavolinën e dialogut sikurse nuk ka ndodhur asgjë. "Duhet të ketë qartësi politike që dialogu të përfundojë me njohje të ndërsjellët, me marrëveshje obligative ligjore, e cila është finale mes Kosovës dhe Serbisë. Është agjenda politike ajo e cila ka qenë në vitet '90, e rikthyer përsëri në shtatorin e 2023-s dhe në këtë drejtim mendoj që Kosova nuk

duhet t'i ikë dialogut dhe tavolinës, por Kosova nuk bën të shfaqet në tavolinë dhe të flasë për raportin Kosovë - Serbi sikurse para së dielës. Është situatë komplet e re", ka thënë Hoxhaj.

Sa i përket Asociacionit të Komunave me Shumicë Serbe, Hoxhaj ka theksuar nevojën e koordinimit me ndërkombëtarët dhe strategjinë shtetërore për të ecur përpara drejt normalizimit me Serbinë. Hoxhaj është treguar kritik edhe ndaj udhëheqësve shtetërorë, për të cilët, sipas tij, "nuk duhet të dalin me tituj e lajme".

Kuvendi i Kosovës të enjten ka miratuar rezolutën që dënon sulmin terrorist ndaj Policisë së Kosovës më 24 shtator në Banjskë të Zveçanit. E për nënkryetarin e Kuvendit kjo është dëshmi e unitetit të pozitës dhe opozitës ndaj

policisë, Forcës së Sigurisë së Kosovës dhe Agjencisë së Kosovës për Inteligjencë. "Nuk e shohim raportin tonë me shtetin e Kosovës prej asaj se a është dikush në pozitë apo në opozitë dhe natyrisht që i japim mbështetje të plotë Policisë së Kosovës, Sigurisë së Kosovës, AKI-së, të cilët kanë bërë një punë brilante në një situatë ku edhe shtetet e mëdha do ta kishin vështirë që të përballen nga një sulm në befasi dhe i papritur. Në këtë drejtim mendoj se jemi unikë pranë institucioneve të Kosovës. Ajo çfarë është shkruar në Rezolutën e Kuvendit të Kosovës është në zemër të çdo deputeti dhe mendoj të çdo anëtar, të çdo qytetari, pavarësisht prej dallimeve partiake që i kemi për tema të tjera", ka thënë Hoxhaj. Në orët e para të mëngjesit të 24 shtatorit është vrarë rreshteri i Policisë së Kosovës, Afrim Bunjaku, ndërsa polici tjetër Alban Rashiti dhe një tjetër kanë mbetur të plagosur. Ngjarja e rëndë ka ndodhur në fshatin Banjskë të Zveçanit, ku është sulmuar patrulla policore. Policia ka vrarë tre prej terroristëve dhe ka arrestuar tetë. Policia e Kosovës ka gjetur arsenal armësh në Manastirin e Banjskës, ku terroristët ishin strehuar. Autoritetet në Kosovë kanë nxjerrë prova që implikojnë nënkryetarin e Listës Serbe, Milan Radojčić, si udhëheqës i këtij grupi terrorist. E ky i fundit, i cili është i sanksionuar edhe nga Shtetet e Bashkuara të Amerikës dhe Britania e Madhe, e ka pranuar se e ka udhëhequr grupin terrorist.

26 VJET NGA PROTESTA E LËVIZJES STUDENTORE E VITIT 1997

Protesta e Lëvizjes Studentore e '97-s i dha shpirt platformës për çlirim dhe shtet të pavarur

26-vjetorin e protestës studentore të 1 tetorit të vitit 1997 e kanë kujtuar liderët e Lëvizjes Studentore dhe profesorë universitarë që ishin pjesë e asaj proteste. Në këtë përvjetor u theksua se kjo lëvizje u bë simbol i rezistencës së rinisë dhe qytetarëve të Kosovës ndaj regjimit serb dhe u shndërrua në promotore të luftës për liri dhe pavarësi. Kjo ngjarje, thuhet nga profesorët universitarë, duhet të shënohet në tekstet shkollore dhe të kujtohet nga gjeneratat e reja si akt sublim i fillimit të procesit të lirisë dhe pavarësisë së Kosovës

EPOKA E RE

Mal QORRAJ

PRISHTINË, 1 TETOR - Të dielën janë mbushur 26 vjet nga protesta e Lëvizjes Studentore e vitit 1997. Ishte Lëvizja Studentore e atëhershme që organizoi protestat të cilat u organizuan për ta kundërshtuar pushtimin e Kosovës nga Serbia dhe kthimin e studentëve në objektet universitare, nga të cilat studentët ishin dëbuar nga regjimi i kasapit, Sllobodan Millosheviqit, në fillim të viteve '90.


Përpos masave të dhunshëm që regjimi kishte vendosur vite më parë në universitet, dëboi studentë dhe profesorë nga universiteti dhe imponoi planprogramin serb për mësim. Kjo protestë konsiderohet një ndër aktet më të rëndësishme të asaj kohe. Për ta shpërndarë

protestën paqësore, policia serbe kishte përdorur dhunë ndaj studentëve dhe profesorëve.

Në ballë të asaj proteste ishin liderët e Lëvizjes Studentore, Bujar Dugolli, Muhamet Mavraj, Driton Lajçi dhe Albin Kurti, së bashku me rektorin e atëhershëm të Universitetit të Prishtinës, Ejup Statovci. Pas tyre, në këtë protestë ishin edhe mijëra studentë dhe profesorë.

26-vjetorin e protestës studentore të 1 tetorit të vitit 1997 e kanë kujtuar liderët e kësaj lëvizje dhe profesorë universitarë që ishin pjesë e kësaj proteste. Sot në këtë përvjetor theksohet se kjo lëvizje u bë simbol i rezistencës së rinisë dhe qytetarëve të Kosovës ndaj regjimit serb dhe u shndërrua në promotore të luftës për liri dhe pavarësi.

Kjo ngjarje, thuhet nga profesorët universitarë, duhet të shënohet



në tekstet shkollore dhe të kujtohet nga gjeneratat e reja si akt sublim i fillimit të procesit të lirisë dhe pavarësisë së Kosovës. Ish-kryetari i Lëvizjes Studentore, Bujar Dugolli, ka thënë për gazetën "Epoka e re" se Lëvizja

Kurti bëri homazhe te varri i profesor Ejup Statovcit

Kryeministri i Kosovës, Albin Kurti, në 26-vjetorin e protestave studentore dhe në nderim të jetës dhe veprës së profesor Ejup Statovci, ka vendosur kurora me lule të freskëta dhe ka bërë homazhe te varri i tij, bashkë me Bujar Dugollin, Driton Lajçin, Hajrullah Koliqin, Ahmet Gecën, Lulëzon Jagxhiun, Jeton Rexhën dhe Atthe Hykollin.

Duke e vlerësuar lart kontributin e profesor Statovcit, pas homazheve kryeministri Kurti tha se ky nderim te varri i tij tregon se nuk e harrojmë atë datë dhe shtoi se i kemi aq shumë

borxh profesor Statovcit i cili Universitetin e Prishtinës e lartësoi edhe në aspektin ndërkombëtar, po ashtu edhe atë politiko-shoqëror në kushte tejet të vështira.

Ndërsa Bujar Dugolli ka thënë se rektori Ejup Statovci ishte në ballë bashkë me studentët dhe një shtyllë e madhe e përkrahjes që e pati lëvizja e studentëve. Nga pjesëmarrësit u përkujtua edhe rektori Kelmendi i cili ishte pasues i rektorit Statovci, gjithashtu edhe veprimtari dhe lideri studentor nga Mitrovica, Ali Ahmeti, për kontributin e dhënë për studentët, universitetin dhe shoqërinë.





Mavraj me unionet e studentëve nderon Ali Ahmetin, Artim Jasharin dhe Sedat Kabashin

Muhamet Mavraj, një nga drejtuesit e Lëvizjes Studentore të '97-s, me rastin e kujtimit të protestës së 1 tetorit të vitit 1997, ka bërë homazhe te varri i veprimtarit e liderit studentor nga Mitrovica, Ali Ahmeti, i cili ndërroi jetë një vit më parë. “Nuk të harrojmë Ali Ahmeti! Urime 1 tetorin! Dhe faleminderit për gjithfarë që bërë për Kosovën, në demonstrata e gjatë luftës! (Me unionet e studentëve të Mitrovicës 1997-99, babanë e

Aliut, gruan dhe fëmijët, motrat, vëllezërit, shokët)”, ka shkruar Mavraj në “Facebook”. Po ashtu, Mavraj ka bërë homazhe edhe te varri i Artim Jasharit. “Nuk të harrojmë trim Artim Jashari! Urime 1 tetorin dhe faleminderit për gjithfarë që bërë për Kosovën, në demonstrata e gjatë luftës! Nderime pa kufi!”, ka shkruar Mavraj në “Facebook”. Mavraj ka qëndruar edhe në Korishë të Prizrenit për ta nderuar Sedat Kabashin për

kontributin e tij në demonstrata. “Nuk të harrojmë Sedat Kabashi! Urime 1 tetorin dhe faleminderit për gjithfarë bërë për Kosovën, në demonstrata e gjatë luftës! (Në Korishë, me familjen e ngushtë e të gjerë të Sedatit, Laurën me djemtë, motrat, vllaznitë, ish-Unionin e Prizrenit e plot bashkëluftëtarë. I falënderojmë fort për pritjen e dashurinë për Sedatin!”, ka shkruar Mavraj.

tetorit ushqejnë një impuls krenarie, natyrisht, por na bëjnë t'i kujtojmë shumë shokë tanët dëshmorë”, ka theksuar Mavraj, i cili në përvjetorin e 25-të, një vit më parë, të kësaj ngjarje historike, kishte vizituar në Hagë çlirimtarët të cilët po mbahen në paraburgim, duke theksuar se në këtë përvjetor askush më shumë sesa këta nuk meriton respektin dhe përkrahjen.

“Kjo ngjarje duhet të shënohet në tekstet shkollore dhe të kujtohet nga gjeneratat e reja...”

Ish-rektori i Universitetit të Prishtinës dhe një nga pedagogët pjesëmarrës në protestën e 1 tetorit 1997, Ibrahim Gashi, ka theksuar për gazetën “Epoka e re” se protestat studentore të vitit 1997, veçmas ajo e 1 tetorit, paraqesin nivelin më të artikuluar të joviolencës aktive në lëvizjen e deritashme politike të shqiptarëve të Kosovës. “Shumë studiues e cilësuan atë si zëvendësim të lëvizjes paqësore pasive me një veprim joviolent aktiv. Efektet e këtij veprimi të vendosur të studentëve ishin të menjëhershme. Me këtë lëvizje studentore u bë mjaftueshëm e qartë se çdo formë e rezistencës paqësore, sado e organizuar në mënyrë të përkryer, përballë regjimit okupues serb, do të ngelë pa efekte. Faktori ndërkombëtar që kishte interesim për zhvillimet në Ballkan dhe në Kosovë nga kjo lëvizje studentore e kuptoi seriozitetin e situatës shpërthyesë dhe qartësoi pozicionet e veta karshi palëve rivale. Edhe faktori vendor u ndërgjegjësua se lëvizja paqësore e rezistencës nuk mund të prodhonte më asnjë efekt konkret në përmbushjen e platformave politike të shqiptarëve të Kosovës ndaj dhe

gradualisht pas kësaj lëvizjeje po hapej perspektiva për një strategji të luftës së armatosur midis palëve. Krejt në fund, me të drejtë mund të konstatojmë se protestat studentore të vitit 1997 janë hallka e fundit e lëvizjes së rezistencës paqësore, e cila arriti të lidhet, mbase edhe të shndërrohet në hallkën e parë të rezistencës së armatosur të UÇK-së, e cila e vitalizoi, i dha shpirt dhe e sendërtoi platformën e Kosovës për çlirim dhe shtet të pavarur. Pikërisht këtu qëndronte rëndësia e kësaj lëvizjeje historike studentore dhe si e tillë do të zërë vend në historinë e re të Kosovës”, ka thënë Gashi.

Ai ka theksuar se Universiteti i Prishtinës mund të cilësohet jo vetëm si truri, por edhe si forca kryesore vepruese e lëvizjes politike kosovare që mundësoi në të gjitha etapat e saj sendërtimin e platformës kombëtare për liri dhe shtet.

Edhe profesori dhe ish-rektori i UP-së, Arsim Bajrami, një nga organizatorët e kësaj proteste, ka thënë për gazetën “Epoka e re” se protestat e 1 tetorit të vitit 1997 ishin një momente kthese dhe fillim i thyerjes së Serbisë dhe ish-Jugosllavisë në Kosovë. “Këto protesta thyen mitin e pamposhtmërisë së Serbisë, duke i dhënë fund nënshtrimit dhe rezistencës paqësore si një kushttrim lirie, që u bë realitet me luftën heroike të UÇK-së”, ka thënë ai.

Bajrami ka thënë se duke kujtuar 26-vjetorin e kësaj proteste madhështore, kur studentët e profesorët u bënë bashkë kundër robërisë, sot kujtojmë me pietet rektorin e atëhershëm të UP-së, Ejup Statovci dhe udhëheqësit e studentëve. “Në mënyrë të veçantë ata që rënë në altarin e lirisë në luftën çlirimtare së cilës iu bashkëngjiten. Kujtojmë Edmond Hoxhën, Zahir Pajazitin e Hakif Zejnullahun me shokë, që ishin në rreshtat e parë të kësaj proteste, e pastaj edhe luftës së lavdishme të UÇK-së. Si një nga organizatorët e kësaj proteste bashkë me kolegët dhe studentët e Fakultetit Juridik jemi krenarë që këto protesta frymëzuan heronjtë dhe martirët që dhanë jetën në shërbim të atdheut, lirisë dhe pavarësisë së Kosovës. Kjo ngjarje duhet të shënohet në tekstet shkollore dhe të kujtohet nga gjeneratat e reja si akt sublim i fillimit të procesit të lirisë dhe pavarësisë së Kosovës”, është shprehur profesor Bajrami.



Studentore, e cila filloi më 1 tetor të vitit 1997 me atë që njihet si protestat e 1 tetorit, ishte ndër ngjarjet më të rëndësishme historike në Kosovë në fund të shekullit XX. “Kjo lëvizje u bë simbol i rezistencës së rinisë dhe qytetarëve të Kosovës ndaj regjimit serb dhe u shndërrua në promotore të luftës për liri dhe pavarësi. Në këtë 26-vjetor kujtojmë me respekt aktivistët dhe luftëtarët e lirisë nga radhët e kësaj lëvizjeje që ranë në altarin e lirisë, si dhe kontribuuesit e shumtë, studentë dhe profesorë të Universitetit të Prishtinës, që u rreshtuan në rrugën e drejtë të lirisë së Kosovës. Përkujtimi i këtyre datave historike duhet të na shërbejë për motivim edhe më të madh, për ta dashur edhe më shumë universitetin, kombin dhe shtetin”, ka thënë Dugolli. Edhe Driton Lajçi, një nga drejtuesit e kësaj lëvizjeje, ka thënë

se është emocion i veçantë dhe krenari e madhe kur kujton atë elan të madh studentor. “Krenar dhe me fat që kam qenë një nga drejtuesit e saj. Slogani ynë kryesor ishte ‘Universiteti, Kosova, studentët, sot, nesër vonë’. Ndërsa për brezin e gjeneratës sime, sot, nesër e përgjithmonë faleminderit për kontributin e dhënë për Universitetin, liri dhe nderim studentëve të rreshtuar në UÇK që ranë për lirinë e Kosovës. Sot të përfitojmë nga modeli i atdhedashurisë që praktikuan ne dhe ta zbatojmë në objektivat e sotme. Që të kemi Universitetin dhe arsimit cilësor dhe ndërlidhje ndërmjet arsimit dhe ekonomisë, ndërsa ndërhyrjeve të Serbisë në Kosovë t'i përgjigjemi me unitet dhe mbështetje ndaj atyre që po sakrifikojnë duke e mbrojtur shtetin e Kosovës çdo ditë të

lumit Zot”, ka theksuar Lajçi. Edhe Muhamet Mavraj, një nga drejtuesit e Lëvizjes Studentore, ka thënë se më 1 tetor është mposhtur frika e Kosovës, ka rënë miti i frikës dhe secili shqiptar është ndier mirë, më solidar me tjetrin. “Me një fjalë, u rikthye vlera tradicionale. Përvjetorët e 1



Skenari i përfitimit të Albin Kurtit mbi gjakun dhe fatkeqësitë e të tjerëve

Shkruan: Hisen BERISHA

Ja edhe një rikonfirmim nga ky i sëmurë nga dëliri i pushtetit dhe pengu i agjendave kundër shtetit të Kosovës.

Polici i vrarë është veç viktima e radhës së këtij të çmenduri nga millosheviqizmi.

Deri me tani Kosova i numëron pesë (5) të vdekur nga ambicjet e tija për pushtet. Nuk durojgatë dhe mbi gjakun e rreshtit Bunjaku dhe dhimbjen e zonjës Bunjaku, tre fëmijëve jetim, prindërve e bashkëpunëtorëve në Policinë e Kosovës, por edhe mbarë kombit që u pikëlluan me vdekjen e tij, e deklaroi se qëllimi i skenarit në Veri, të koordinuar me Vuçiqin përmes Radojçiqit, ishte rritja e përqindjes së përkrahjes për të dhe ambicia edhe për një mandat për ta quae përpara tradhtinë ndaj vendit e popullit.

Në këtë mënyrë përfitoi mbi gjakun e Arben Xheladinit, Mon Balajt, vëllezërve Dehari dhe së fundmi Afrim Bunjakut, e dy të plagosurve për të cilët asnjë përkujdesje nuk

tregoi, ngase ata nuk janë të mire dhe as heronj, sepse nuk kanë vdekur për kauzën e tij elektorale. E për edukatën e tij dhe shkollën politike që përfaqëson vetëm "shqiptari i vdekur është i mirë! E hero, mund të shpallet njeriu që bën heroizëm edhe për së gjalli siç janë policët e plagosur.

Edhe policëve që ishin në operacion iu takon çmimi presidencial për trimëri, si standard kushtetues. Por, jo qëllimi i këtij janë viktimat, mbi gjakun e të cilëve e rritë votën, siç edhe e kam theksuar në analizën time pas aksionit dhe siç po e deklaroi ky, ende pa u tharë lotët e familjes për Afrimin, as dy policët tjerë të plagosur, se: "besimi në qeverinë tonë është mbi 55 për qind, më i larti në Ballkan – ecim bashkë drejt mandatit të ri!"

Ndërsa fëmijët e të vrarëve jetojnë në mjerimin e përgjithshëm, duke iu thurur himne shpura qeverisë kriminale e kuislinge e Kosovës.

Ky është njëri pa Zot, pa dinjitet e pa ndërgjegje, se edhe fjala e shenjtë na udhëzon që "të mos përfitojmë mbi fatkeqësinë e



tjetrit".

Viktimat e çmendurisë tënde, historia do i ruaj si heronj të sakrificës së tyre për shtetin, lirinë të ardhmen e fëmijëve tanë, sepse

me atë motiv e bënë. Por, ty do të mallkoj historia për rrethanat që krijove, që ata të humbin jetët e tyre. E kjo meqë ende nuk ka sistem drejtësisë, që do iu akuzonte

si vrasës politik.

Shpresoj në hetimin nga Kongresi e inteligenca amerikane të procesit të dialogut dhe ju do merrni dënimin e popullit dhe historisë.

Heronjtë i dua të gjallë

Shkruan: Izmi ZEKA

Një natë e errët kur Prishtina vlonte nga zhurma e këngëve e shëtitjet sa ngaherë të kapin drithërimet dhe shpirti të vlon nga buzagazi i shpirtit të lirë i jetës që nuk kthehet mbrapa. Në anën tjetër televizionet me politikanë që krijojnë përshtypjen se jeta lindi këtu mes nesh dhe të tjerët janë merimangat që shtrijnë trupin ngado e kudo ku gjejnë vend. Atje përkaj Kosovës netët kanë dhimbje e herë-herë shpresë.

Sa herë që zgjohem këto ditë nuk e di pse ama kam frikë nga paqja e vyshkur e sidomos kur shohë fëmijët e dalldisur duke lozur me buzëqeshjen e panda. Kam frikë nga paqja që as vet nuk e di pse. Ndoshta pse kam dëgjuar për jetën e djeshme, për nënat që mbetën pa fëmijë, baballarët pa familjar, ndoshta pse unë jam frikacak e rritur në paqe dhe të djeshmen e kam vetëm të dëgjuar dhe kujtim i hidhur.



Ndoshta kur të bëhem e zonja edhe unë si të tjerët nuk do ta ndjej frikën ama tash nuk kam shpjegim pse kjo po ndodh me mua.

Harrova të ju them se babin tim e hëngri paqja. Ai ishte ai polici me plot jetë, ku ekranet, portalet ishin të mbushur me fotografinë e

tij. Sa herë e pyesja për të djeshmen ai vetëm heshtke. Thua se diçka kishte në shpirt.

Atë ditë që iku unë isha në gjumë. E më mirë tani po them mos të zgjohesha fare. Kam frikë nga paqja. Mendohem e them me vete e pse babai im të vdiste kur liria i kishte rrënjët në gjak e pse,

pse që nuk po mundem të gjejë përgjigje ka disa ditë,

Nëna më shikon shpesh dhe nuk flet fare. Nga tradita loti nuk i shihet. Paçka edhe nëse qan e bërtet me të madhe them shpesh. Kulla u shemb për ne e nëna ime as edhe një zë nuk e lëshon, as edhe kur erdhi babai me plumb në ballë. Unë qaja, bërtitja pa nda sikur fëmijët 5 vjeçar edhe pse sot i kam të 14-ta. Unë jam ajo vajza që fola për heroin tim, atë ditë kur të gjithë më shikonit. Ama ju ndoshta nuk e dinit që babai im ishte edhe në të gjallë heroi im. Për atë qava kur fola dhe kur i thash lamtumirë.

Kisha dëgjuar dhe lexuar se si Drenica u dogj flak gjatë luftës, kisha par dokumentare për fëmijët e vrarë, për baballarët që u dogjën të gjallë në shtëpitë e tyre nga forcat serbe. Më kuptoni tani e kam në shpirt dhe po ndjej se neve na morën diçka nga zemra e që nuk po kam fuqi ta shpjegoj. Të lexosh, të dëgjosh qenka ndryshe. Tani që më preku

shpirtin ju të tjerët që i keni baballarët nuk e kuptoni. Ju mund të flisni, mund të shkruani por shpirtin e keni të qetë.

Atë ditë kur babin e pash të shtrirë mu dukë që toka u nda në dysh. Prandaj kam frikë nga paqja. Nuk e dua këtë paqe që ma mori babanë. Them të drejtën unë doja që heroin tim ta kisha të gjallë e jo te vdekur. Ai ishte babai im më kuptoni. Ai më lehdonte faqet, më puthte çdo mëngjes. Ai këndonte këngë me sharkinë që e la në mur. E kishte amanet nga babai i tij. E tani kush do të më thotë eja vajza ime, kush do të më këndoj këngën e bareshës çdo mëngjes, kush do të vijë në shkollë e pesat e mija ti shikoj. Unë e desha heroin tim të gjallë buzagaz. Nuk i dua heronjtë të vdekur në paqe. Heronjtë i dua të gjallë. Ndoshta veç të vdekur janë heronj. Jam ende e re dhe plot shpresë. E dua jetën. Babai më iku atë mëngjes përkaj Kosovës. Më kuptoni njerëz, ai nuk është më. Dallëndyshja e tij mbeti pa heroin e gjallë.

Basha: Vuçiqi është kokë e këmbë brenda skenarit të sulmit terrorist në Banjskë

TIRANË, 1 TETOR - Kryetari i Partisë Demokratike të Shqipërisë, Lulzim Basha, ka komentuar sulmin terrorist në Kosovës javën e kaluar. Ai ka thënë se presidenti serb, Aleksandër Vuçiq, është kokë e këmbë brenda këtij skenari. "Duhet të pranojmë dhe komunikojmë se ajo që ndodhi në Kosovë nuk është një incident i izoluar.

Armatimi është futur në Kosovë prej muajsh, me qëllim për të provokuar një skenar që duket spontan por është i parapërgatitur, një skenar shumë i ngjashëm me atë që ndodhi në Krime në vitin 2014. Asgjë nuk mund të ndodhte pa ndihmën dhe miratimin e segmenteve shtetërore në Serbi. Pyetja që shtrohet për

Vuçiqin është se deri ku shkon pjesëmarrja e tij në këtë skenar lufte, jo vetëm për Kosovën por për Ballkanin. Është bashkautor apo një president i marrë nga mashat e Rusisë, duke filluar nga Vulini? Deklarata e Radojçiqit lë pak hamendësim që Vuçiqi është kokë e këmbë brenda në këtë skenar", ka thënë Basha.



Sveçla dhe Hoxha: Autorët e sulmit të 24 shtatorit në veri u përgatitën në pronën e Radoiçiqit

MITROVICË, 1 TETOR - Ministri i Punëve të Brendshme, Xhelal Sveçla, së bashku me drejtorin e Policisë së Kosovës, Gazmend Hoxha, ku kanë prezantuar të dielën në një konferencë për medie pamje që, sipas tyre, dëshmojnë dorën e shtetit serb në sulmin terrorist të 24 shtatorit në Banjaskë të Zveçanit. “Ky organizim terrorist kishte vetëm një qëllim: aneksimin e veriut të Kosovës”, ka thënë Sveçla.

Ai ka thënë se provat dëshmojnë “përgatitjet e këtij grupi nga shteti i Serbisë në qendrat zyrtare të trajnimeve”. “Në këtë tentim aneksimi janë angazhuar drejtpërsëdrejti presidenti Aleksandër Vuçiq, ministri i Mbrojtjes i Serbisë, Milosh Vuçević dhe shefi i komandës i ushtrisë serbe, Milan Mojsilović”, ka thënë Sveçla, duke shtuar se terroristët ishin përgatitur në pronën e Millan Radoiçiqit. Pamjet, siç ka thënë ai,

dëshmojnë se në drejtim të policisë kishte të shtëna me armë të kalibrave të rëndë edhe pas vrasjes së policit Afrim Bunjaku. “Përgatitjet, trajnimet dhe ushtrimet e këtij grupi janë bërë afër Jagodinës si dhe në Kopaonik. Të gjitha këto pamje janë siguruar nga dronët e grupit terrorist që i kemi konfiskuar”, ka thënë Sveçla, duke shtuar se provat janë të pakontestueshme dhe se tani “është i domosdoshëm



dënimi dhe sanksionimi i këtij sulmi terrorist nga faktori ndërkombëtar”. Ndërsa drejtori i policisë, Gazmend

Hoxha, ka prezantuar në detaje armatimin e konfiskuar pas sulmit terrorist në Banjaskë të Zveçanit.

Fondi ‘i pavërejtshëm’ për veriun

PRISHTINË, 1 TETOR - Tash e dhjetë vjet për komunat me shumicë serbe në veri të Kosovës janë grumbulluar mbi 14 milionë euro, të destinuara për zhvillim ekonomik dhe investime në infrastrukturë, por zona vazhdon të mbetet vatër tensionesh. Paratë janë pjesë e të ashtuquajturit Fond Zhvillimor i Mirëbesimit, për të cilin Kosova dhe Serbia janë pajtuar në vitin 2013, në kuadër të bisedimeve për normalizimin e marrëdhënieve.

Qëllim i këtij fondi është t'i zhvillojë dhe integrojë komunat Mitrovicë e Veriut, Zveçan, Zubin Potok dhe Leposaviq, ku popullata serbe, që nga paslufta më 1999, nuk u bindet vendimeve të institucioneve të Kosovës, por strukturave paralele serbe që funksionojnë nën dirigjimin e Beogradit zyrtar.

Paratë e Fondit grumbullohen nga importi i mallrave përmes pikave kufitare me Serbinë, Jarinjë dhe Bërnjak, të cilat gjenden në veri të Kosovës.

Nga Bashkimi Evropian, që ndërmjetëson bisedimet Kosovë - Serbi, kanë thënë se nga ky fond janë realizuar projekte të ndryshme - nisur nga infrastruktura rrugore deri te qendrat kulturore dhe rekreative. Por, nga anketat që “Radio Evropa e Lirë” realizon kohë pas kohe me qytetarët në veri, qytetarët kryesisht shprehen të shqetësuar për situatën politike dhe kundër vendimeve që marrin institucionet e Kosovës.

Si pasojë e mosbindjes, por edhe



ndikimit të strukturave serbe, ata nuk paguajnë as rrymë, as ujë që nga paslufta. Vazhdojnë t'i kenë shkollat dhe spitalet që funksionojnë nën sistemin e Serbisë.

Shumica e bizneseve në zonë, po ashtu, nuk janë të evidentuara dhe nuk paguajnë asnjë detyrim ndaj institucioneve të Kosovës tash e 24 vjet.

Nga nëntori i vitit të kaluar serbët e kësaj pjese kanë braktisur edhe institucionet e Kosovës në të cilat kanë marrë pjesë si pasojë e një vendimi të Qeverisë së Kosovës për t'i rirregjistruar makinat me targa ilegale serbe.

I banuar me rreth 50 mijë qytetarë, veri i Kosovës është shpesh edhe skenë e përlëshjeve të dhunshme. Të fundit kanë ndodhur më 24 shtator kur grupe të armatosura serbësh kanë sulmuar Policinë e Kosovës, duke vrarë një polic.

Dragisha Mijaçiq, drejtor i

Institutit për Zhvillim Ekonomik Territorial (INTER), me seli në Zubin Potok, ka thënë për “Radion Evropa e Lirë” se Fondi Zhvillimor i Mirëbesimit nuk ka mbledhur mjete të mjaftueshme financiare që do të krijonin parakushte për zhvillimin ekonomik dhe përmirësimin e jetesës së qytetarëve në veri. “Kur investoni para në mjediset lokale, gjithmonë ka përfitime. Por, nuk ka pasur efekte që mund të matet. Për dhjetë vjet janë investuar 14 milionë euro. Ato janë aq pak para sa që nuk mund të arrijnë kurrfarë rezultati domethënës”, ka thënë Mijaçiq.

Disa projekte kanë dhënë rezultate të mira, por “shumë prej tyre nuk janë përfunduar dhe nuk kanë dhënë kurrfarë rezultatesh”, ka thënë ai, pa specifikuar më shumë. Por, për Haki Shatrin, ekspert i çështjeve ekonomike, projektet e ndërtuara nga fondi në fjalë kanë

pasur efekt në mirëqenien e qytetarëve lokalë. Sipas tij, janë strukturat paralele, të udhëhequra nga Serbia, që nuk i lejojnë qytetarët t'i pranojnë publikisht rezultatet. “Atje janë të pranishme strukturat paralele, të ndikuara nga Beogradi, të cilat i pamë publikisht ditët e fundit. Por, në jetën e përditshme të qytetarëve lokalë kanë qenë të pranishme çdo kohë, duke iu bërë presion dhe duke i frikësuar. Prandaj, qytetarët janë në hamendje, në dilema se kah t'ia mbajnë, sepse i kanë frikësuar vazhdimisht që të mos punojnë, të mos bashkëpunojnë dhe të mos e njohin shtetin e Kosovës”, ka thënë Shatri. Ai ka theksuar se krijimi i këtij fondi madje i ka favorizuar katër komunat në veri, pasi asnjë komunë tjetër nuk e gëzon një fond të tillë të veçantë.

Pikëpamjet politike, të ndikuara nga Beogradi, pengojnë

përparimin e veriut, ka thënë edhe profesori i ekonomisë në Prishtinë, Muhamet Sadiku. “Përkundër investimeve nga mjetet e ekzekutivit, por edhe nga burimet e jashtme, në këtë pjesë të vendit dominojnë pikëpamje destruktive politike dhe ato janë pengesë e madhe për të krijuar përparim për qytetarët lokalë”, ka thënë Sadiku.

Ku dhe sa është investuar?

Bordi menaxhues i Fondit Zhvillimor të Mirëbesimit përbëhet nga përfaqësues të BE-së, përfaqësues të Ministrisë së Financave dhe përfaqësues të komunave veriore. Nga Zyra e Bashkimit Evropian në Prishtinë kanë bërë me dije se nga vlera e përgjithshme e Fondit, prej 14 milionë eurosh, mbi 6.9 milionë euro janë shpenzuar për projekte në komunën e Mitrovicës së Veriut, mbi 3 milionë euro në komunën e Zveçanit, mbi 2.5 milionë euro në komunën e Zubin Potokut dhe mbi 2 milionë euro në komunën e Leposaviqit.

Investimet, sipas BE-së, përfshijnë ndërtim dhe riparim të infrastrukturës rrugore, ndërtim të objekteve kulturore, sportive dhe rekreative, mbështetje për ndërmarrjet e vogla dhe të mesme, blerje të pajisjeve mjekësore e të tjera.

Përveç mjeteve nga Fondi Zhvillimor i Mirëbesimit për këto komuna, edhe Qeveria e Kosovës ka ndarë mbi 16 milionë euro për projekte nga buxheti i sivjetmë.

Osmani: Serbia duhet ta dijë se do të përballet me një popull të gatshëm për ta mbrojtur lirinë me çdo kusht

PRISHTINË, 1 TETOR - Presidentja e Kosovës, Vjosa Osmani, ka thënë se Serbia duhet ta dijë se do të përballet me një popull që është i gatshëm ta mbrojtë lirinë me çdo kusht. Kështu ka deklaruar e para e shtetit në një intervistë për mediumin italian “La Repubblica”.

Osmani ka thënë se Serbia kreu një akt agresioni të dielën e shkuar, ku një grup prej 30 personave terroristë serbë

sulmuan Policinë e Kosovës. Nga ky sulm mbeti i vdekur rreshteri Afrim Bunjaku dhe tre terroristë serbë. “Serbia duhet ta dijë se do të përballet me një popull të gatshëm për ta mbrojtur lirinë me çdo kusht dhe se NATO është me ne”, është shprehur presidentja Osmani në një intervistë për mediumin italian.

Po ashtu, Osmani ka thënë se Serbia është duke vepruar

shumë më ndryshe se ajo që është parë në 25 vitet e fundit. “Ka prova të pakundërshtueshme. Serbia ka kryer një akt agresioni me datën 24 shtator dhe po përgatitet të kryejë një akt tjetër duke përfunduar forcat e armatosura dhe artilerinë në kufirin me Kosovën. Është diçka ndryshe nga ajo që kemi parë në 25 vitet e fundit. E paprecedentë”, ka thënë Osmani.



"Sharr Travel" nderohet me çmimin si agjencia turistike më e mirë mbarëshqiptare 2023

TIRANË, 1 TETOR - Kompania turistike "Sharr Travel" është vlerësuar në Tiranë me çmimin agjencia më e mirë turistike mbarëshqiptare. Ky organizim për herë të parë në Shqipëri është organizuar nga "Albanian Excellence dhe Travel Magazine Balkans". Kryetari i Lezhës, Pjerin Ndreu, ia ka dhënë çmimin

drejtorit të kësaj agjencie, Ruzhdi Kurtishajt. Me këtë rast, Kurtishaj e ka falënderuar për besimin që qytetarët ia kanë dhënë ndër vite agjencisë "Sharr Travel". "I nderuar të pranoj çmimin e veçantë 'Agjencia më e mirë turistike mbarëshqiptare 2023' nga kryetari i Bashkisë së Lezhës, njëkohësisht mik shumë i mirë imi dhe i të

gjithë qytetarëve të Kosovës, z. Pjerin Ndreu! Ky çmim është i të gjithë qytetarëve që besuan në shtëpinë e përbashkët 'Sharr Travel'. Falënderoj veçmas secilin nga ju për besimin e dhënë ndër vite!", ka thënë Kurtishaj. Ai i ka falënderuar qytetarët e Kosovës që i kanë besuar dhe udhëtojnë me "Sharr Travel".



PDK-ja nuk pajtohet me pushtetin për numrin e të punësuarave në Kosovë

PRISHTINË, 1 TETOR - Ministri i Financave, Hekuran Murati, ka thënë se gjatë mandatit të tij si ministër ka dyfishuar numrin e të rinjve të punësuar. Murati ka shkruar në "Facebook" se për 30 muaj janë mbi 32 mijë të reja e të rinj që kanë filluar punën. Ai ka thënë se asnjëherë më parë nuk ka pasur kaq shumë masa e mbështetje për punësimin e të rinjve sikurse me qeverinë aktuale. "Gjithsej të rinj të punësuar të moshës 15-24 në fillim të vitit 2021 ishin 28 293 persona. Kurse në fund të korrikut 2023, numri i tyre është mbi 60 884 persona. Pra për 30 muaj, janë mbi 32 mijë të reja e të rinj që kanë filluar punën. Diçka e tillë nuk ka ndodhur asnjëherë në historinë e shtetit tonë. Sepse asnjëherë më parë nuk ka pasur kaq shumë masa e mbështetje për punësimin e të



rinjve sikurse me qeverinë tonë", ka shkruar Murati. Me këto statistika nuk është pajtuar Partia Demokratike e

Kosovës (PDK). Koordinator i për Financa në Kabinetin e Qeverisjes së Mirë të PDK-së, Arben Mustafa, ka shkruar në "Facebook" se në

fund të vitit 2022, krahasuar me 2021, numri i të papunëve sipas ASK-së është zvogëluar për 38 mijë 298 persona. Sipas, tij numri i

të punësuarve është rritur vetëm për 8 mijë 789 persona. "Pra, shtrohet pyetja ku mbeten ata 29 509 persona që nuk po figurojnë më si të papunësuar, por as si të punësuar?! Përgjigja më e mundshme është se ju kanë bashkëngjitur karvanit të migrimit sepse kanë humbur shpresat për një jetë më të mirë në Kosovë. Në anën tjetër, ministri i Financave po i paraqet disa statistika administrative të punësimit, të zbuluara nga vetë kjo Qeveri, sipas të cilave në Kosovë qenka duke lulëzuar punësimi i të rinjve! Duke ndenjtur i mbyllur në zyrë ndoshta edhe i beson këtij tregimi, por nuk besoj që do ti besonte nëse do të dilte nga pak prej zyrës dhe ta shihte dinamikën e ekonomisë së vendit. Mos të harrojmë, rritja ekonomike në periudhën e fundit është vetëm 2 për qind", ka shkruar Mustafa.

ASK-ja: Më shumë të punësuar me pagë primare dhe sekondare në gusht të 2023-s sesa një vit më parë



PRISHTINË, 1 TETOR - Agjencia e Statistikave e Kosovës (ASK) ka publikuar Statistikat Administrative të Tregut të Punës për muajin gusht 2023. Në njoftimin për medie, ASK-ja ka bërë me dije se në muajin gusht 2023 të punësuar me pagë primare ishin 370 115 persona që, krahasuar me muajin e njëjtë të vitit paraprak (gusht 2022, që ishin 360 164), ka rritje për 9 951 persona, ose 2.8 për qind të

punësuar me pagë primare. Grupmosha me më së shumti të punësuar me pagë primare ishte 25-34 vjeç. "Në muajin gusht 2023 të punësuar me pagë sekondare ishin 17 046 persona, ku krahasuar me muajin e njëjtë të vitit paraprak (Gusht 2022, që ishin 15 851), ka rritje për 1 195 persona ose 7.5 për qind të punësuar. Grup-mosha me më së shumti të punësuar me pagë sekondare ishte 35-44 vjeç",

thuhet në njoftim. Punësimi më i theksuar për muajin gusht ishte në këto aktivitete: administratë publike dhe mbrojtje, sigurim i detyrueshëm social (24.5 për qind), tregti me shumicë dhe pakicë (20.7 për qind), prodhim (10.8 për qind) etj. Këto të dhëna bazohen në të dhënat e Administratës Tatimore të Kosovës (ATK) dhe Agjencisë së Punësimit të Republikës së Kosovës (APRK).

Përdorimi i kartelës bankare, trend në rritje edhe në Kosovë

PRISHTINË, 1 TETOR - Përdorimi i kartelës bankare për të kryer pagesa dhe shërbime ka shënuar rritje për 3.6-përqindësh në krahasim me periudhën e njëjtë të vitit të kaluar. Kjo mënyrë e pagesës është duke u vlerësuar më e lehtë, më e sigurt dhe më e shpejtë. Përveç kësaj, nga Shoqata e Bankave e Kosovës kanë thënë se kartelat bankare janë thelbësore për blerjet online dhe udhëtimet ndërkombëtare. Ish-kryetari i Odës

Ekonomike të Kosovës, Safet Gërxhaliu, ka vlerësuar se avancimi në aspektin digjital dhe atë të pjekurisë së një shteti është shfrytëzimi sa më i madh i kartelave. Gërxhaliu ka potencuar se përdorimi i kartelës bankare për të kryer shërbime është ndër format më të stabile dhe të sigurta, derisa shtoi se pagesat cash lënë hapësirë për falsifikim dhe kontrabandë. "Është ndër format më të sigurta, më të shpejta dhe më stabile. Sa më

tepër qarkullim të cashit nëpër duar të qytetarëve, shumë më tepër ka informalitet dhe kontrabandë dhe kjo e dëmton Kosovën", ka thënë Gërxhaliu për "KP". Ndërsa nga Shoqata e Bankave të Kosovës kanë thënë se pagesat digjitale reduktojnë fenomenin e falsifikimit të parasë dhe eliminojnë nevojën për të mbajtur sasi të mëdha parash. Në anën tjetër nga Banka Qendrore e Kosovës (BQK) kanë thënë se të gjitha



brendet e kartelave të lëshuara në Republikën e Kosovës janë ndërkombëtare

dhe, si të tilla, lëshohen sipas standardeve më të mira ndërkombëtare të sigurisë.

Isak Guta, vigan i diasporës!



Shkruan: Imer Xhemail LLADROVCI

Fizika kuantike ka zbuluar se shkëputja e një trupi nga një tjetër nuk do të thotë ndarje përfundimtare, absolute e tyre. Këta dy trupa mund të largohen nga njëri-tjetri në distanca të mëdha astronomike që maten me vite drite dhe përsëri të japin dhe marrin me njëri-tjetrin me një shpejtësi që e kalon atë të dritës, pra të ushtrojnë ndikim reciprok në kuptimin e njëkohshmërisë.

Shkurt, kështu largesa kthehet në një madhësi krejt të papërfillshme, inekzistente. Ky është një ligj universal që vlen edhe në jetën njerëzore, ndaj dhe interesimi ynë për këto njohuri që lidhen drejtpërdrejt me botëkuptimin tonë. Edhe pse dijet e kësaj shkence gjejnë zbatim të gjerë në jetën tonë të përditshme, që është cilësisht krejt e ndryshme nga ajo e brezave të shkuar, fizika kuantike përsëri është trajtuar si një gjysmëshkencë, disi si një lloj dije që qëndron mes fiksonit dhe realitetit. Me fjalë të tjera, herë pas here është thënë hapur se ajo është më shumë fantazi sesa shkencë.

Vetë Albert Ajnshtajni (Albert Einstein) që në vitin 1905 e mori cmimin Nobel për kontributin e tij në lëminë e optikës kuantike e shikoi deri në fund të jetës së tij këtë teori me dyshim dhe mosbesim. Ai që me gjithë jetën e tij kishte qenë kundër cdo lloj autoriteti, për ironi të fatit, vetë u kthye në një autoritet frenues. Ajnshtajni besonte në një botë

deterministe që nuk lë hapësirë për rastësinë, të cilën sot fizikanti Anton Cailinger e konsideron si gjënë më të cmueshme në shkencën bashkëkohore. Nuk thuhet kot se e vërteta vonon, por vjen një ditë dhe ajo triumfon.

Vitin e kaluar Komiteti i Nobelit në Stockholm u kujtua më në fund për kontributorët më të mëdhenjë të kohës sonë në këtë lëmi, për amerikanin Xhon Klauzër (John Clauser), francezin Alen Aspekt (Alain Aspect) dhe austriakun Anton Cailinger (Anton Zeilinger), të cilëve u dha Nobelin 2022 për fizikë. Tanimë përfundimisht u bë e qartë gjithçka: në rastin e fizikës kuantike nuk bëhet aspak fjalë për fantazi, por për shkencë të mirëfilltë, për një shkencë që e ndryshon botëkuptimin tonë.

Dikush mund të thotë ç'lidhje ka fizika kuantike me fatin e një shqiptari të mërguar. Në shikim të parë asgjë, por nëse çështjen e shohim më thellë, nga kënvështrimi i dijes, shumë, jashtëzakonisht shumë. Jeta e njeriut, edhe ajo e mërgimtarit nuk del jashtë kuadrin të ligjeve të natyrës, sepse njeriu dhe natyra përbëjnë një unitet, njeriu është natyrë, pjesë e saj. Fati jetësor i Isak Gutës ishte i tillë që mund të ilustron bindshëm këtë ligj universal të ndarjes dhe njëkohësisht të kontaktit të vazhdueshëm të pjesës me tërësinë, prej të cilës ajo është shkëputur, siç e dimë

nga jetëshkrimi i tij, përmes dhunës së jashtme. Jeta e tij është një udhëtim i gjatë e i ngatërruar drejt Itakës që mori fund pak ditë më parë. Ai u kthye aty, në vendin që ai e desh me gjithë shpirt. Isak Guta vërtet fizikisht për një gjysmëshekull të tërë jetoi larg atdheut, por me zemër ishte gjithmonë brenda tij. Ai u lind në këtë vend dhe tani që nuk është më fizikisht në mesin tonë eshtrat e tij pushojnë në këtë dhe. Jetoi larg atdheut, por atdheun e kishte brenda tij, thellë në zemër. Shqipëria për të ishte atdhe shpirtëror që kurrë nuk mund të braktisej, pavarësisht sesa larg saj mund të ishte ai.

Këtë bindje të tij të palëkundshme më në fund e dëshmojnë librat e tij që shkroi në vitet kur Kosova më nuk ishte nën sundimin serb. Një pjesë të krijimtarisë së tij letrare dhe aktivitetit kulturor ia kushtoi aktorit me famë botërore Aleksandër Moisiu, me të cilin, veç artit të madh, e lidhte edhe fati i mërgimtarit. Isak Guta mishëron tipin e shqiptarit që është i lidhur me mijëra fije të padukshme me atdheun e tij. „Fati i popullit tim është fati im“ thoshte Pjetër Bogdani. Kjo thënie i shkon shumë jetës së Isak Gutës. Ai jetoi për këtë vend dhe gjithë energjitë shpirtërore i vuri në shërbim të atdheut, edhe pse jo rrallë kontributi i tij nuk u përfillë e nuk u kuptua në

masën e duhur.

Por kjo gjë nuk ndodhte për herë të parë dhe vetëm me të, historia jonë kombëtare dhe ajo botërore njeh shumë raste të tilla, vetë fizika kuantike i ka trajtuar në njëfarë mase paraardhësit e saj gjenialë si sharllatanë, ndaj dhe presidenti amerikan Xhon Kenedi i përballur me këtë përvojë gjithnjëzore thoshte: mos shiko se ç'bën vendi yt për ty, por bëje atë që ti duhet ta bësh për të. Bindja ime është se Isak Guta pikërisht këtë gjë ka bërë. Ai ka punuar gjithmonë për Shypninë, ndaj dhe ne e nderojmë e i përkulemi punës së tij.

Isak Guta e vlerësonte shumë traditën shqiptare, sepse ai gjente pikërisht aty forcën për të qëndruar i pathyer në vështirësi dhe frymëzimin për të shkruar librat e tij.

Shqiptari kurrë s'u përkul para vështirësive, por qëndroi krenar në furtunën e shekujve dhe u bë edhe më i fortë. Njëri nga këta shqiptar, pikërisht në këtë aktivitet përkujtimor është momenti të thuhet ajo që nuk i është thënë asnjëherë, ishte edhe vetë Isak Guta, jeta e të cilit përbën një frymëzim të madh për të gjithë ne.

Me Isak Gutën u njoha në vitin 2006 në Berlin, në kuadër të një aktiviteti të diasporës sonë në Gjermani që i kushtohej rolit, krizës organizative në të cilën ndodhej ajo dhe nevojës së saj të ngutshme për riorganizim.

Isak Guta ishte i interesuar dhe shumë i angazhuar për ringjalljen organizative të mërgimtarëve tanë, sepse ishte i ndërgjegjshëm për ndihmën e madhe që ata mund t'i jipnin vatrës në këtë moment të rëndësishëm historik të kthesës së madhe. Veç luftës duhej fituar edhe paqja. Ai gjithmonë diasporën e ka shikuar si një Shqipëri tjetër, të jashtme që bën gjithçka për atdheun, një engjell mbrojtës të saj. Pas tryezës dhe debatit që u zhvillua në takimin e sipërpërmendur shkuaam në klubin „Oda shqiptare“ në kryeqytetin gjerman ku patëm mundësi të vazhdojmë diskutimin e të njihemi nga afër. Më kanë mbetur në kujtesë fjalët e tij: „Kam shumë pak jetë për të punuar për çështjen tonë kombëtare.

Mundohem që të punojë, të shkruajë, të hedhë sa më shumë në hambarin kombëtar.“ Për gjërat e mëdha me të vërtetë koha është e pamjaftueshme! Isak Guta ishte i vetëdijshëm se për çështjen tonë të madhe secili duhej të jipte më të mirën e tij, sepse vetëm kështu „hambari kombëtar“, siç e quante ai figurativisht çështjen tonë të përbashkët kombëtare, do të ishte plotë, dmth. kështu do të sigurohej ekzistenca e kombit tonë. Menjëherë e kuptova se kisha para vetes një njeri tej mase të përkushtuar e të dhënë pa asnjë rezervë pas kauzës shqiptare.

Në vitet në vazhdim ne u njohëm edhe më mirë me njëri-tjetrin. Në një varg aktivitetesh kulturore ku Isak Guta dha një kontribut të çmuar kuptova se kisha të bëja me një njeri që kurrë nuk iu kishte shmangur detyrimeve atdhetare dhe kishte punuar me të gjitha mundësitë që kishte për mobilizimin e shqiptarëve për momentin vendimtar. Dhe atë moment ai e përjetoj gjatë Luftës sonë Çlirimtare në vitet 1998 e 1999. Isak Guta nuk e pranoi kurrë Jugosllavinë si shtet legal në hapësirën tonë etnike.

Vetë emri i shtetit i përjashtonte shqiptarët nga përbërja e tij, sepse në fakt kjo ngrehinë shtetërore që në krye të herës ishte koncipuar si një shtet për sllavët e jugut dhe jo për shqiptarët. Në programin e këtij shteti, zhbërja e shqiptarëve si entitet ishte pothuajse e vetëkuptueshme, një detyrim për elitën e këtij shteti. Viti 1913 i Konferencës së Londrës që e ndau Shqipërinë dhe gjysmën e territoreve të saj ia dha dy mbretërive sllave që më vonë u bashkuan edhe me popujt e tjerë sllavë në një mbretëri të vetme, për Isak Gutën ishte viti i tragjedisë sonë të madhe kombëtare.

Pas shtypjes së Lidhjes së Prizrenit më 1881, ndarja e Shqipërisë në vitin 1913 përbënte ngjarjen e dytë të madhe të defaktorizimit të shqiptarëve, të cilët po bëheshin gjithnjë e më të vegjël dhe më të parëndësishëm për Ballkanin. Dhe, çka është më e rëndësishmja, për veten e tyre! Isak Guta kishte studiuar për filmin në Pragë të Çekisë që atëherë quhej Çekoslovakia. Përgatitjen e tij profesionale ai vuri në shërbim të diasporës shqiptare që atëbotë luftonte me mjete politike për çlirim nga Serbia. Në Düsseldorf ai i organizoi mërgimtarët tanë në fushën e kulturës, formoi grupin teatral.

Kështu ai synonte që diaspora jonë të dëshmonte se edhe në kulturë ajo nuk e pranonte diktatin serb. Jugosllavia, ky shtet kundërshtiqiptar, në atdhe anëtarët e organizatave ilegale i arrestonte dhe i dënonte, kurse në diasporë i vriste, por megjithatë nuk arrinte që t'i nënshtrointe shqiptarët përderisa ata ishin në gjendje të zhvillonin edhe aktivitet kulturor jashtë kontrollit të saj. Shkurt, kultura në sytë e tij ishte një fushë e gjerë e veprimit atdhetar që e mbante gjallë frymën e qëndresës. Vrasja e Jusuf e Bardhosh Gërvallës e Kadri Zekës për të kishte qenë një moment i kristalizimit të vetëdijes se për lirinë e kombit shqiptar njeriu duhej të ishte i gatshëm të vdiste në çdo moment.

Nëse kjo jetë kishte ndonjë

vlerë, atëherë vlerën asaj ia jepte pikërisht lufta me përkushtim absolut për çlirimin e ardeut, pa përfillur asnjë rrezik. Tani çështja e madhe i kishte dhe heronjtë e saj që para së gjithash ishin dhe heronjtë e Isak Gutës. Në vitet e luftës sonë çlirimtare, ai u vu në mbështetje të Ushtrisë Çlirimtare të Kosovës që prej momentit që ajo u paraqit në jetën tonë publike, dmth. që nga prilli i vitit 1996 dhe dha gjithcka që kishte mundësi për të dhënë, në mënyrë që lufta e armatosur për liri të kurorëzohej me sukses.

Pas shumë dhjetëvjeçarësh aktiviteti intenziv në shërbim të atdheut, pas 12 qershorit të vitit 1999, Isak Guta këtë përvojë të madhe jetësore e hodhi në librat e tij, në të cilat ai vazhdon të jetojë. Tani, thoshte ai tërthorazi, ishte koha e librit, lufta duhej të vazhdonte përmes tij, me mjete të tjera, sepse vetëm një popull i ndriçuar në shpirt e në mendje do të ishte i gatshëm të mbronte në çdo çast lirinë e tij të fituar me gjak.

Isak Guta u largua nga vendlindja e tij shumë herët, si fëmijë, në kohën e zezonës, në vitet 1950, kur ishte vetëm 12 vjeç.

Ishte, pa asnjë dyshim, largim i dhunshëm, dëbim. Ishin kohë të vështira ato vite kur Beogradi ishte tërbuar politikisht, prandaj e rriti tryshinë e aparatit represiv të shtetit, në formën e veprimtarisë kriminale të UDB-së, mbi popullsinë shqiptare për ta thyer përfundimisht shpirtin e saj qëndrestar. Spastrimi etnik, për të cilin është folur aq shumë në këto 30 vitet e fundit dhe vazhdon të flitet ende për të, në Kosovë ka qenë realitet që në vitin 1913, edhe pse ai atëherë kishte një emër tjetër: quhej masakër.

Austriaku Leo Frojndli (Leo Freundlich) na ka lënë dëshmi rrëqethese për këtë kohë. Një gazetar tjetër nga Rusia, Leon Trotzki, që shkruante në këtë kohë nga Ballkani, e ka dokumentuar masakrën e shqiptarëve në Kumanovë që përbën një prej masakrave më të mëdha të këtij viti të përgjakshëm. Shqiptarët përndiqeshin në forma të ndryshme, por ky trajtim jonjerëzor i tyre nuk i mjaftonte qarqeve shoviniste në Beograd, kështu që atje vazhdimisht bëheshin plane e hartoheshin elaborate e memorandumë për dëbimin masiv të shqiptarëve nga viset e tyre. Çdo shqiptar ishte në shënjestër të kësaj politike kriminale që assesi nuk mund të pajtohej me faktin se në këtë dhe në këtë nënqiell kjo racë njerëzore jetonte mijëra vjet para ardhacakëve që makutërisht donin hapësirë të pakufijshme vetëm për veten e tyre.

Shpërthimi i Luftës së Dytë Botërore e pengoi realizimin e



marrëveshjes jugosllavo-turke të vitit 1938 për dëbimin e shqiptarëve në Turqi. „Iseljevanje Arnauta“ e Vasa Čubrilović-it e dëshmon faktin se elitat serbe pandërprerë janë marrë me hulumtimin e rrugëve dhe gjetjen e mënyrave efektive për dëbimin e shqiptarëve nga vatrat e tyre të lashta.

Në emër të historisë veprohej në mënyrë kundërhistorike. Historiografia serbe konstruktonte gjithfarë skenarësh për të arsyetuar politikën kundërshtiqiptare të Beogradit politik. Autoktonia e shqiptarëve kontestohet jo vetëm në politikë, por edhe në të ashtuquajturat shkenca serbe. Kontestimi i prejardhjes sonë ilire është ndërtuar mbi themelet e kësaj politike kundërshtiqiptare. Mund të thuhet se që prej projektit „Načertanija“ të Ilija Garašanin-it në mesin e shekullit XIX Serbia nuk pushoi së shestuati plane për uzurpimin e tokave shqiptare, përvetësimin e tyre të plotë dhe zbrazjen nga shqiptarët. Ajo donte hapësirë dhe jo njerëz që nuk do të pranonin kurrë projektet e saj politike shtetomëdha.

Në këtë kuptim ekspansionizmi serb ishte në armiçësi edhe me gjithë popujt e tjerë, jo vetëm me shqiptarët, por, me shqiptarët, siç e dëshmon historia, serbët u treguan shumë të egër, të pamëshirshëm e mizor. Në të tjerët, në një moment të dhënë, të favorshëm për ta, e kërkonin marrëveshjen, me shqiptarët

ata, serbët, si dje ashtu edhe sot, ajo që ndodh sot në Veri nuk përbën asgjë të re, kurrë nuk deshën të merren vesh, nuk synuan marrëveshje, por thjesht zhdukjen e tyre fizike. Shprehja se shqiptari është i mirë vetëm si shqiptar i vdekur nuk ka lindur rastësisht në mesin serb. Jugosllavia komuniste pati premtuar barazi për shqiptarët dhe realizim të parimit të vetëvendosjes, por ajo shpejt i harroi premtimet e saj dhe e ndryshoi në mënyrë rrënjësore kursin e saj politik, duke u kyqur në traditën e Jugosllavisë mbretërore.

Aleksandar Ranković-i kishte filluar në dimrin e vitit 1956 aksionin për mbledhjen e armëve që shqiptarët nuk i kishin se kur i kishin pasur, kishin ditur ç'të bënin me to. Kryengritja e Ferizajt në vjeshtën e vonë të vitit 1944 tregon se shqiptarët e kësaj anë kur ende kishin armë ishin të vendosur për të mbrojtur veten e tyre. Më 2 dhjetor 1944 ata i pritën partizanët në llogore luftime. Ripushtimin serb aq shumë e urrenin sa që më parë vdisnin se nënshtroheshin. Por në vitin 1944 e 1945 në botë zotëronte një konjunkturë tjetër, për lirinë e shqiptarëve askund nuk mund të gjeje mirëkuptim e mbështetje, kështu që Kryengritja e Ferizajt u shtyp relativisht lehtë nga çetnikët që ishin konvertuar në partizanë. Ende edhe sot për këtë ngjarje të madhe nuk ekziston një studim. Ata që

vdiçën në këtë luftë sikur i harruam. Ky është një mëkat i madh, i pafalshëm! Mëkat dhe turp!

Familja e Isak Gutës, siç u tha, u zhvendos në vitin 1956 në Shkup. Shkupi që për shekuj kishte qenë kryeqyteti i këtyre viseve në këtë kohë shërbente si vend ku grumbullosheshin shqiptarët që do të dëboheshin në Turqi, sipas marrëveshjes së re jugosllavo-turke të Koča Popović-it e Mehmet Fuat Këprülü-t të po këtij viti, të arritur pikërisht në Shkup. Familja e Hamit Gutës mbeti në Shkup ku Isaku e vazhdoi shkollën fillore dhe e kreu shkollën e mesme. Për studime ai shkoi në Pragë të Çekisë, në universitetin më të vjetër të Europës. I kreu me sukses studimet dhe u kthye në atdhe, por pushtetmbajtësit që e kishin degdisur jashtë atdheut nuk i dhanë punë, kështu që ai edhe njëherë tjetër u detyrua të marrë rrugët mërgimit.

Vdekja sjellë me vete pikëllimin dhe hidhërimin e thellë kur paraqet fundin, por kur ajo është diçka tjetër, dmth. kur nuk është fund, por fillim i diçkaje të re, me fjalë të tjera kur ajo është pjesë e një kthesë të madhe, atëherë më nuk mund të flasim për pikëllim, por shpresë.

Isak Guta u lind në verën e fundit të Shypnisë, siç quhej atëherë në popull shteti titullar, dhe vdiç në një verë tjetër që ndoshta do të jetë vera e kthesës së madhe për fatet e Shypnisë.

Vdekja e arsyes: Pse të mos flasim edhe kinezët shqip?

Nga: Fatos TARIFA

Për të mënjeluar çdo keqkuptim, deklaroj që në hyrje dy të vërteta: E para, unë nuk jam as gjuhëtar, as historian. E dyta, unë e dua gjuhën time, shqipen, të cilën gjithnjë jam përpjekur e përiqem ta flas e ta shkruaj drejt, saktë dhe bukur dhe, po kështu, jam shumë i interesuar ta njoh objektivisht historinë e vendit dhe të popullit tim.

Këto dy të vërteta që sapo deklarova më shtynë të shkruaj për një dukuri që, edhe pse jo masive, është bërë shqetësuese për shumë njerëz te ne. Jo vetëm në rrethet akademike, por edhe në radhët e shumë qytetarëve që kanë një sens realist në gjykimet e tyre, ose një common sense, nëse më lejoni të përdor një term që, i huazuar prej Aristotelit, përdoret sot gjerësisht në gjuhën e përditshme thujse kudo.

Mbrëmë, një meme që qarkullon në rrjetet sociale, u bë shkak i një vargu shkëmbimesh online – disa serioze, disa humoristike – me miq e shokë. Çfarë thuhet në atë meme me dy fjalë, është kjo: Shqipëria është përsëri “kërthiza e botës”.

Nëse për Enver Hoxhën Shqipëria socialiste ishte vetëm një “fanar ndriçues” për të ardhmen e njerëzimit, për disa shqiptarë të sotëm vendi ynë është “origjina e gjithçkaje” mbi Tokë dhe gjuha shqipe “e para gjuhë që ka folur njerëzimi”!

Një milenium para erës së re, duke mos pasur as më të vogël ide mbi qytetërimet e tjerë në Perëndim, kinezët besonin se perandoria e tyre shtrihet në qendër të botës, e rrethuar nga popuj barbarë, ndaj edhe e quajtën atë “Perandoria e Qendrës” (Middle Kingdom).

Një milenium para kinezëve ishin egjiptianët ata që e quajtën perandorinë e tyre “Perandoria e Qendrës”. Pas tyre ishin grekët e lashtë ata që e bënë Evropën “qendër të botës”, edhe pse njihnin një pjesë shumë të vogël të këtij kontinenti – kryesisht bregdetin e verior dhe atë jugor të Mesdheut dhe disa territore në veri dhe në lindje të tij. Kur u zbulua Amerika, ky kontinent u quajt “Bota e Re”, ndërsa evropianët vazhduan ta quanin kontinentin e tyre “bota e vjetër”. Të gjitha këto tashmë kanë rënë pasi disa shqiptarë, që shquhen për “patriotizëm” të flaktë dhe njohuri “të jashtëzakonshme” historike e gjuhësore (edhe pse, njëllor si unë, nuk janë as historianë, as gjuhëtarë), kanë “zbuluar” dhe besojnë – pa pasur nevojë të provojnë gjë prej gjëje – se asgjë në këtë botë që

popullohet nga tetë miliardë njerëz nuk bën kuptim dhe s’mund të shpjegohet pa ne, pa disa milionë shqiptarë dhe pa gjuhën shqipe.

Është krejt pa rëndësi të përmend emrat e atyre personave që janë autorë, mbrojtës apo përhapës të pikëpamjeve të tilla, ndaj edhe mjaftohem me ato çka ata besojnë dhe thonë. Dhe, çfarë ata thonë janë ide të tilla deluzive si:

“Në Romën e lashtë flitej shqip”; “gjeranishtja mund të kuptohet përmes shqipes”, në mos edhe ka rrjedhur prej saj; “në Francë është folur shqip”; “greqishtja është bijë e shqipes”; “shqipja është çelësi i të gjitha gjuhëve indo-evropiane”. Edhe Thoti, një prej perëndive në Egjiptin e lashtë dhe vetë egjiptianët kanë folur shqip. (Pse jo, a nuk flet shqip edhe nipi im Heru, që mban emrin e një prej perëndive kryesore të Egjiptit të lashtë).

Por, nuk janë vetëm këto. “Hebrenjtë e zanafillës flisnin shqip”; pellazgët po se po. Edhe “sumerët dhe aztekët e Meksikës flisnin shqip”. “Krishti vetë ishte shqiptar”; “shqiptar ishte edhe Zeusi”. Shqipja është folur që në fillimet e njerëzimit; ajo është “gjuha e parë”, “mëma e të gjitha gjuhëve”. Gjuha shqipe është “gjuha e natyrës” dhe vetë “natyra ka folur shqip qysh nga fillimi”.

Është një mori idesh nga më fantazmagoriket që disa, pa pikë droje, madje me shumë zell dhe me delirin e “zbuluesve të mëdhenj”, i thonë kudo që munden – në libra që i sponsorizojnë vetë, në artikuj gazetash, në intervista televizive, në portale dhe blogje të ndryshëm.


Edhe pse pikëpamjet e tyre variojnë, këta njerëz kanë të përbashkët tri gjëra:

E para, ata vetë e shkruajnë dhe e flasim keq gjuhën shqipe.

E dyta, pikëpamjet e tyre janë larg edhe prej asaj që mund të quhet “shkencë divulgative”.

E treta, këta njerëz janë me njëri-tjetrin në një garë që tashmë ka mbaruar, pasi dikush prej tyre e ka gjetur, më në fund, origjinën më të lashtë të gjuhës sonë – shqipja ka lindur bashkë me njeriun, si gjuhë e humanitetit, si gjuha e parë e Homo Sapiensëve, madje kjo gjuhë është e vjetër sa vetë natyra, sepse është “gjuha e natyrës”!

Që Zeusi ishte shqiptar dhe fliste shqip, kjo as duhet vënë në dyshim. Ç’mund të ishte tjetër Zoti i të gjithë Zotave veçse një shqiptar dhe ç’gjuhë tjetër mund të fliste ai veç shqipes! Këtu mbyllet çdo gjë dhe bëhet e panevojshme që t’i shkohet më thellë njohjes sonë! “Teoritë” e njerëzve të tillë,



sidoqoftë, kanë disa mungesa të ndjeshme, ndaj edhe kërkohet të zhvillohen më tej. Duhet më shumë hulumtime, më shumë se korrelacione iluzore, më shumë fantazi dhe, domosdo, më shumë zell “patriotik”.

Fjala vjen, ende nuk janë dhënë prej tyre prova të mjaftueshme nëse ishin shqiptarët e Mesjetës së vonë ata që u vendosën mes banorëve indigjenë të Meksikës në periudhën e tyre post-klasike (e njohur ndryshe edhe si periudha e kulturës parakolumbiane) dhe u mësuan atyre shqipen, apo ishin grupe aztekësh ata që emigruan në trojet shqiptare në prag të invazionit osman dhe e mësuan shqipen këtu, për ta bërë atë gjuhën e aztekëve në vendin e tyre. Ose, nëse Krishti ishte shqiptar dhe fliste shqip, pse s’mund të ketë qenë shqiptar edhe profeti Muhamed dhe pse ai duhet të fliste një gjuhë tjetër, të ndryshme nga shqipja?!

Ose, nëse Demokriti, filozofi materialist i Greqisë së lashtë, pra edhe ai një shqipfolës, udhëtoi në shekullin e pestë para erës së re, përmes Azisë Qendrore, deri në Indi, ai me siguri duhet të jetë marrë vesh me banorët e atyre viseve të largëta në shqip. Edhe ky është, pra, një subjekt për t’u eksploruar.

Por, ndoshta, edhe vetë Buda, edhe pse i lindur në atë vend që sot quhet Nepal, duhet të ketë folur shqip. Ç’gjuhë tjetër mund të flisnin ai, indianët dhe popujt e tjerë të Azisë Juglindore që përqafuan budizmin si fenë e tyre?! Po pse jo edhe Konfuçi dhe Lao Zë në Kinë, bashkëkohës të Budës, dhe tërë kinezët?!

Në shkencë, faktet janë kokëfortë. Faktet duhen provuar. Dhe, ato provohen nëse janë ose ndodhin realisht, nëse evidentohen ose zbulohen empirikisht, nëse shpjegohen përmes një arsytimi kritik e rigoroz. Në shkencë asgjë nuk pranohet si e vërtetë absolute, e provuar një herë e përgjithmonë. Nëse thua Zeusi dhe Krishti flisnin

Krisht, fillim apo fund që të shpjegojë atë çfarë ata duan të zbulojnë e të kuptojnë.

A i vlen të merremi me këta pseudostudues, pseudohistorianë e pseudogjuhëtarë shqiptarë, që gjithnjë e më shpesh po shfaqen në ekranet e disa televizioneve dhe në disa gazeta? Ndoshta jo!

Por, nëse kur të keqen e ndeshim të shfaqet dhe kur e shohim të ndodhë rrimë e bëjmë sehir – si spektatorë të një shfaqjeje komike që mundet edhe të na argëtojë – dhe vetëm presim, e keqja dhe e pavërteta, sidomos kur kamuflohen si qëndrime dhe si një detyrë patriotike, hedhin rrënjë lehtë, sidomos në radhët e një brezi të ri që lexon gjithnjë e më pak.

Interneti e ka bërë sot shumë të lehtë që dije të rreme – nga teoritë konspirative deri te njohuri që, edhe pse mund të synojnë një qëllim të mirë, janë të paverifikuara e të pavërteta – të përhapen masivisht e të krijojnë një mjedis jo miqësor për zhvillimin e arsimit e të shkencës. Interneti ka bërë të mundur edhe që njerëz pa asnjë meritë dhe pa asnjë kredibilitet shkencor të hiqen e të shiten sot para një publiku jo mirë të informuar si studiues apo shkencëtarë të vërtetë. Kjo, në vetvete, përmban një rrezik real.

Edhe pse nuk ka ndonjë lidhje të drejtpërdrejtë me këtë çka thashë më sipër, kujtoj se, disa kohë më parë, kur një kolegu im profesor, anëtar i Akademisë së Shkencave, më tha me mburrje se ai është më i njohur në botë se sa Eqrem Çabej, pasi në Research Gate ai është më i cituar sesa Çabej dhe ka një “research interest score” më të lartë sesa gjuhëtari ynë më i shquar.

Çfarë megallomanie! Kur Eqrem Çabej u nda nga jeta, në vitin 1980, Interneti nuk ishte as ëndrrat më të guximshme të njerëzimit dhe, pra, nuk kishte se si vepra e shquar e tij të bëhej botërisht e njohur kudo dhe për këdo, siç ndodhë rëndom sot me çdo tezë masteri dhe me “studimet” e dhjetëra pseudohistorianëve, pseudoantropologëve apo shqiptarologëve diletantë si ata për të cilët shkrova më sipër.

Ndërsa dëgjoja kolegun tim akademik të mburrej për “meritat epërore” të tij ndaj Çabejt të madh, aty për aty më erdhën ndër mend fjalët e të ndjerit Prof. Zija Xholi, mentorit tim në Universitetin e Tiranës, kur na fliste me shumë pasion për filozofët e lashtë grekë. “Ne të gjithë dimë sot shumë më tepër sesa dinte Aristoteli në kohën e vet”, thoshte Prof. Xholi, “por askush nga ne nuk është më i mençur se ai”.

EURO GLASS
 SAINT-GOBAIN SEKURIT PILKINGTON
 Invert
 Adr: Fushë Kosovë
 Mob: 044 10 20 10 / 049 145 336
 E-mail: euro.glass@live.com



Sukses i madh nga Istogu në Kupën Evropiane

ISTOG, 1 TETOR - Istogu është kualifikuar në raundin e tretë të Kupës Evropiane për hendbolliste. Te ky sukses i madh skuadra istogase arriti me fitoren 29:27 ndaj skuadrës portugeze, 1Maio/Ada. Fitoren për

kualifikim, Istogu e arriti të dielën në Pejë, me kthesën e madhe të bërë në pjesën e dytë. Pas pjesës së parë portugezet ishin në epërsi 14:13. Por në pjesën e dytë skuadra e Faruk Shalës shfaqti shumë më tepër.

Krijoi epërsi prej disa golash, ndërsa në fund fitoi me dy gola dallim, që ishte mjaftueshëm për kualifikim. Të shtunën, Istogu kishte pësuar 31:30. Albina Rugova udhëhoqi Istogun drejt suksesit të

madh duke i realizuar nëntë gola. Gjashtë i kishte Tainara Luna Goncalves, ndërsa nga pesë i shënuan Arlinda Dinarica e Fatiha Haimer. Kontributi nuk ka munguar edhe nga lojtaret e tjera.



Drita fiton derbin e qytetit, Ballkanin kryeson Superligën

EPOKA E RE Veton ZYMBERI

PRISHTINË, 1 TETOR - Derbi i Anamoravës i ka takuar Dritës që e mposhti Gjilanin me rezultat 2-0, në ndeshjen që u zhvillua në stadiumin "Sami Kelmendi" në Lipjan dhe i takoi javës së 8-të në Albi Mall Superligën e Kosovës. Drita kaloi në epërsi në minutën e fundit të pjesës së rregull, kur realizoi Almir Ajzerajt për 1-0. Ndërkaq, fitoren e vulosi tetë minuta para fundit të ndeshjes Ardit Tahiri, i cili e shfrytëzoi asistimin e Albin Prapashticës për të vulosur rezultatit final 2-0. Tash Drita ka 15 pikë dhe renditet në vendin e tretë, me një pikë më pak se Llapi dhe katër pikë më pak se Ballkani, që kryeson renditjen. Në anën tjetër Gjilani mbetet në vendin e shtatë me 7

pikë. Në ndeshjen tjetër që u zhvillua të dielën, Feronikeli 74 e mori një pikë në Klinë pasi luajti baras me Dukagjinin (1-1). Skuadra vendase kaloi në epërsi në minutën e katërt shtesë të pjesës së parë, kur realizoi Iljasa Zulfiu. Pesë minuta pasi filloi pjesa e dytë mysafirët nga Drenasi e rivendosën baraspeshën në rezultat duke barazuar rezultatit në 1-1 me golin e Florent Avdylyt. Kampioni në fuqi, Ballkani para tifozëve të vet të shtunën ka shënuar fitore në duel me kryesuesin e deritashëm, Llapin, me rezultat 2-1. Për Ballkanin realizues ishin Nazmi Gripshi dhe Almir Kryeziu. Për llapjanët shënoi talenti Elvir Gashjani, në minutën e 72-të. Tani Ballkani kryeson renditjen me 19 pikë, tri më shumë se Llapi dhe ka një



ndeshje më pak të zhvilluar. Në ndeshjen tjetër, Malisheva ka shënuar fitore në stadiumin "Përparim Thaçi" në Prizren në përballje me Lirinë (1-0). Golin e fitores për mysafirët e shënoi Ilir Mustafa, në minutën e 68-të nga

penalltia, pasi paraprkishtë Etnik Brruti u pengua brenda zonës nga portieri i Lirisë, Arlis Shala. Ndeshja e fundit e javës së 8-të zhvillohet sot (e hënë) në Lipjan ndërmjet Fushë Kosovës dhe Prishtinës.

SUPERLIGA - Java 8

| | |
|---------------------------|-----|
| Drita - Gjilani | 2-0 |
| Dukagjini - Feronikeli 74 | 1-1 |
| Ballkani - Llapi | 2-1 |
| Liria - Malisheva | 0-1 |

Të hënë takohen:
15:00 Fushë-Kosova - Prishtina

| Tabela | | Pikë |
|-------------------|---|------|
| 1. Ballkani | 7 | 19 |
| 2. Llapi | 8 | 16 |
| 3. Drita | 7 | 15 |
| 4. Malisheva | 8 | 12 |
| 5. Prishtina | 7 | 10 |
| 6. Dukagjini | 8 | 8 |
| 7. Gjilani | 7 | 7 |
| 8. Feronikeli '74 | 8 | 7 |
| 9. Liria | 8 | 6 |
| 10. Fushë Kosova | 6 | 1 |

Kampionia vazhdon me fitore, Ylli shkatërroi Istogun



PRIZREN, 1 TETOR - Kampionia e Kosovës, Peja shënoi fitoren e dytë në Prince Caffè Superligë, ku mundi Proton Cable Prizrenin me shifrat 85:115 (18:25, 25:30, 23:27, 19:33). Pejanët e nisën më mirë ndeshjen dhe qysh në çerekun e parë tri herë kishin epërsi deri në shtatë pikë, aq sa e fituan edhe këtë pjesë 18:25. Mysafirët vazhduan me lojë të mirë edhe në periudhën e dytë, për të ngritur epërsinë në 12 pikë, 35:47, ndërsa shkuan në pushim me shifrat 43:55. Në periudhën e tretë, prizrenasit afruan epërsinë në 51:57, por kampionët e Kosovës sërish u

shkëputën, deri në 16 pikë epërsi, ku shifrat pas 30 minutash ishin 66:82. Në dhjetë minutat e fundit mysafirët vetëm sa e shtuan epërsinë dhe triumfuan 85:115. Te vendasit u dalluan Urim Zenelaj me 14 pikë, katër kërcime e pesë asistime dhe Isaiha Kelly me 23 pikë, gjashtë kërcime e tri asistime, ndërsa te mysafirët më të mirët ishin John Chandler me 27 pikë, katër kërcime e katër asistime, Lis Shoshi me 21 pikë e 12 kërcime dhe Beck Terwell me 24 pikë e gjashtë kërcime. Proton Cable Prizreni ka dy humbje, kurse Peja ka dy fitore. Ndërsa Golden Eagle Ylli regjistroi

fitoren e parë në këtë edicion të Prince Caffè Superligës. Therandasit fituan me 50 pikë dallim ndaj Istogut me rezultat 126:76 (34:21, 31:14, 34:13, 27:28). Ylli ka një fitore e një humbje, kurse istogasi dy humbje. Takimi në palestrën "13 Qershori" nuk kishte shumë histori, me vendasit që dominuan nga fillimi deri në fund dhe fituan bindshëm 126:76. Te vendasit u dalluan Valon Bunjaku me 22 pikë, shtatë kërcime e tetë asistime, Jalen Nesbitt me 23 pikë, gjashtë kërcime, katër asistime dhe Jan Palokaj me 22 pikë, katër kërcime e pesë asistime.

Ferizaj nuk ia del ndaj Maccabit

FERIZAJ, 1 TETOR - Ndonëse janë angazhuar maksimalisht, hendbollistet e Ferizajt janë ndalur në raundin e dytë të Kupës Evropiane. Të dielën Ferizaj e luajti ndeshjen e dytë me skuadrën izraelit Maccabi

Arazim Ramat gan. Skuadra izraelite fitoi në "Bill Clinton" me rezultat 33:24. Dallimi i madh në rezultat u bë në minutat e fundit. Pjesa e parë përfundoi 16:13 për Maccabin. Lëndimi i portieres së Ferizajt, Kaba Teninke, në

minutat e parë, e ka pasur ndikimin e madh në rezultat. Teninke të shtunën shkëlqeu, por për fat të keq u lëndua herët të dielën. Amanda Stein u dallua te Ferizaj me nëntë gola. Shtatë i kishte Amanda Lemos, ndërsa tri i shënoi

Luljeta Esati. Ferizaj ka bërë hap të madh para në krahësim me paraqitjet e kaluara në gara evropiane. Tashmë ka një skuadër garuese që pritet të rivalizojë skuadrat tjetër në garë për titull dhe për kupë të Kosovës.



Bonucci: Kisha ofertë nga Lazio, por vendosa të vij tek Union Berlin

BERLIN, 29 SHTATOR - Ish-mbrojtësi i Juventusit, Leonardo Bonucci, ka folur së fundmi për vendimin e tij për të kaluar tek Union Berlin, teksa zbuloi që kishte pasur ofertë edhe nga Lazio. Në një konferencë për shtyp, italiani theksoi se ndihet i lumtur për

zgjedhjen që ka bërë. "Kisha dy opsione për të zgjedhur mes Lazios dhe Union Berlinit. Në fund të gushtit zgjodha Union Berlin. Pashë dy ndeshjet e para të Bundesligas dhe jam shumë i lumtur që erdha këtu për atmosferën, tifozët dhe ekipin.

Më pas fola me trajnerin dhe vendosa ta pranoj ofertën e Unionit për të përjetuar atë që ndoshta do të jetë sezoni im i fundit. Kam luajtur për 20 vjet në Itali dhe mendoj se ky vendim është shumë i rëndësishëm sepse në fund të

karrierës sime dua të jem një trajner. Besoj se ky vendim ma hap mendjen për gjëra të ndryshme si stili i jetesës dhe metodat e stërvitjes, gjëra që janë krejtësisht të ndryshme në Gjermani në krahasim me Italinë", ka deklaruar Bonucci.



Hyseni për çmimin 'Ylli i javës': Motiv për të shënuar edhe gola të tjerë

"Epoka e re"

PODUJEVË, 29 SHTATOR - Futbollisti i KF Llapit, Muhamet Hyseni, e ka fituar çmimin "Ylli i javës" për javën e 7-të të Albi Mall Superligës. Komisioni i veteranëve të futbollit në përbërje: Muhamet Sylejmani, Selatin Jerliu, Fatmir Mehmeti, vendosi që epiteti i më të mirit për këtë xhiro t'i takojë sulmuesit të skuadrës llapjane, pasi në ndeshjen në udhëtim kundër FC Malisheva ishte lojtar i më i dobishëm dhe efikas në fushë duke shënuar dy gola, duke i mundësuar kështu ekipit të tij që në minutat shtesë të fitojë tri pikë të rëndësishme për ta ruajtur kreun e tabelës në elitë. Çmimin "Ylli i javës" për futbollistin e KF Llapit, Muhamet Hysenit ia dha Andi Sadiku, dizajner grafik në Albi Mall. Pasi mori këtë çmim, Hyseni



u shpreh i lumtur për vlerësimin duke premtuar spektakël golash edhe në xhirot e ardhshme, për faktin që skuadra e tij po tregon karakter të lartë. "Jam jashtëzakonisht i lumtur që jam shpallur 'Ylli i javës'. Ky çmim më motivon edhe më shumë për të punuar dhe realizuar edhe gola të tjera. E kemi nisur shumë mirë

edicionin e ri dhe jemi në rrugën e duhur për t'i arritur objektivat tona. Kam besimin maksimal të shtabit teknik, bashkëlojtarëve dhe tifozëve, gjë që u falënderohem në maksimum. Tifozëve u premtoj edhe gola të tjera që së bashku të arrijmë suksese", ka thënë Hyseni për faqen zyrtare të FFK-së.

Fury: Njerëzit do të tallen me mua nëse humbi ndaj Ngannou, ashtu sikurse kur Unitedi humbi nga Liverpooli 7-0

MANCHESTER, 29 SHTATOR - Boksieri britanik Tyson Fury po përgatitet për duelin e 28 tetorit ndaj ish-kampionit të botës në UFC, Francis Ngannou. Kjo sfidë do të zhvillohet në Arabi. Fury, kampion bote në peshën e rëndë, në një intervistë me Rio Ferdinand, u shpreh se humbja ndaj Ngannou do të ishte po aq turpëruese sa humbja 7-0 e Manchester Unitedit me Liverpoolin sezonin e kaluar. Kur u pyet se çfarë kërcënimi paraqet Ngannou, Fury u përgjigj: "Ai është i fortë fizikisht, një grushtues dinamik me të dyja duart. Ai është regjistruar në librin e rekordeve Guinness si grushtuesi më i vështirë. Ka goditur ndonjëherë ndonjë gjë, kështu që ekziston ai rrezik. Rreziku më i madh nga të gjithë është të luftosh me një luftëtar MMA dhe unë jam kampioni i botës në peshën e rëndë, kështu që çfarë ndodh nëse



ai me mund mua? Njerëzit do të tallen me mua. Do të ishte njësoj si atëherë kur Manchester Unitedi u mund 7-0 nga Liverpooli. Apo jo?", u shpreh Fury, i pamposhtur në karrierën e tij. "Djajtë e kuq" u poshtëruan nga rivalët e tyre kur luajtën më 5 mars në "Anfield". Kjo ishte humbja më e madhe e Manchester Unitedit në Premierë Ligë dhe humbja më e keqe qëkur Erik ten Hag u bë trajner më 2022. Fury është tifoz i Manchester

Unitedit. Ajo humbje mund të jetë e dhimbshme për të si tifoz, humbja ndaj Ngannou do ta dëmtonte shumë moralisht kampionin e pamposhtur të botës në peshën e rëndë. "Të gjithë këta kundërshtarë me të cilët përballam, të gjitha janë luftime të rrezikshme ose janë të gjithë burra të mëdhenj. Të gjithë këta djem janë gunga të mëdha dhe kur i luftoj rreziku është gjithmonë i njëjtë. Ata kanë një shans për goditje me grusht. Por nuk lë kurrë gur pa lëvizur", ka deklaruar Fury. "Unë gjithmonë bëj gjithçka që mundem për të qenë i suksesshëm. Mënyra se si e shikoj është, nëse ky djalë do të më mundë, atëherë do t'i shtrëngoj dorën. Ai duhet të jetë një luftëtar i mirë, sepse unë nuk jam njeri i lehtë për t'u mposhtur siç e kam treguar gjatë viteve", ka shtuar Fury.

SHKURT

Arsenali pa katër titullar ndaj Bournemouthis.

Trajneri i Arsenalit, Mikel Arteta, nuk do të ketë në dispozicion të paktën katër futbollistë titullarë në ndeshjen që skuadra e tij do ta zhvillojë të shtunën ndaj Bournemouthis. Është vetë trajneri ai që konfirmoi mungesat. Fjala është për Declan Rice, Gabriel Martinelli, Leandro Trossard dhe Bukayo Saka, të cilët nuk janë stërvitur që nga derbi i Londrës veriore në fundjavën e kaluar kundër Tottenhamit (2-2). Kësaj liste i shtohen edhe Thomas Partey, Jurrien Timber dhe Fabio Vieira. Kjo do të thotë se trajneri duhet të ndërtojë sërish një ekip të ri, siç bëri të mërkurën, kur fitoi 1-0 ndaj Brentfordit në Kupë.

Eto o akuzohet për kurdisje të rezultateve.

Presidenti i Federatës së Futbollit të Kamerunit që nga dhjetori 2021, Samuel Eto'o, është subjekti i një hetimi. Ish-sulmuesi i Interit dhe Barcelonës, pas akuzave të ish-zëvendës-presidentit federal, po hetohet nga policia me akuzën se ka kurdisur ndeshjet e kategorisë së dytë për të ngjitur Victoria Unitedin në kategorinë e parë. Kështu shkruan "The Guardian". Sipas saj, personi në fjalë ka hedhur poshtë të gjitha akuzat. Gazeta e njohur britanike raporton se hetimi do të jetë më i gjerë dhe do ta prekë të gjithë federatën, që nga momenti kur në krye të saj u vendos ish-sulmuesi i Barcelonës. Ky hetim mund të përfshijë deri në 40 persona.

Mourinho: shtetë fillimi më i keq në karrierë time.

Trajneri Jose Mourinho është munduar të arsyetohet pasi Roma pësoi humbje të thellë nga Genoa me rezultat 1-4. Trajneri portugez ka theksuar se është fillimi më i keq në karrierën e tij por që, sipas tij, Roma luajti dy finale evropiane radhazi falë tij. "Është fillimi më i keq në karrierën time. Megjithatë, mendoj se është hera e parë që Roma luan dy finale evropiane radhazi", u shpreh Mourinho. "Është skuadra që kemi dhe me këtë skuadër duhet të dalim nga kjo situatë. Nuk ka më afat transferimi. Askush nuk mund të largohet apo të arrijë. Ky është grupi që kemi me cilësitë dhe problemet e tij. Nuk kemi kohë për të qarë. Mund të qajmë nga brenda, sepse na dhemb zemra, veçanërisht për mua për shkak të raportit tim me tifozët e Romës. Por do t'i kthehem punës. Ndeshja tjetër vlen tri pikë, jo shtatë apo tetë, por bëhet një ndeshje shumë e rëndësishme për ne", ka deklaruar Mourinho.

Ten Hagen e ka besimin e Unitedit.

Drejtesit e Manchester Unitedit janë të kënaqur me punën e Erik ten Hag, edhe pse ky sezon nuk ka nisur shumë mirë. "Djajtë e Kuq" renditen pas javës së gjashtë në vendin e nëntë në Premierligë me 9 pikë të grumbulluara. Tri fitore dhe po kaq humbje për Unitedin, që dështoi edhe në sfidën e parë të fazës së grupeve në Ligën e Kampionëve kundër Bayern Munchenit. Gjithsesi, optimizmi në kampin e kuq është i madh dhe besimi kundrejt teknikut holandez është i palëkundur. Drejtuesit po përgatitin rinovimin me Ten Hag, të cilin duan të mbajnë gjatë në "Old Trafford". 53-vjeçari ka kontratë deri më 2025, por tek Unitedi duan ta zgjatim më shumë bashkëpunimin me të. Një vendim që konfirmon pozitën e palëkundur të trajnerit, por edhe një mesazh i qartë për lojtarët që nuk kanë marrëdhënie të mirë me të si Sancho.

Reali nuk synon vetëm Mbappen, por edhe Sonin

Real Madridi nuk po planifikon vetëm transferimin e Kylian Mbappes nga PSG-ja, por edhe kapitenit të ri të Tottenham Hotspurit, Son Heung-Min. 31-

vjeçari korean është pjesë e Tottenhamit prej vitit 2015, derisa ka kontratë deri në vitin 2025, kurse ka shënuar 5 gola deri tani në Premierligë, duke e

ndihmuar skuadrën të bëjë mirë dhe të sigurojë rezultate pozitive. Vetë Son shpreson të luajë një ditë me skuadrën më të titulluar në Evropë. Shumë

vite në ishull me Tottenhamin dhe vetëm dy finale të humbura (Champions+Carabao). Son dëshiron të fitojë trofe dhe Reali është mundësia më e

mirë për ta bërë. Gjithsesi, arritja e akordit me presidentin Daniel Levy nuk do të jetë një mision i lehtë për spanjollët.

